


EBÈLÙ,

NSHAPÌTÀ MWISAMBÒMBÒ ³

 Mwoyi wènù awu mu dindà emu, balundà bàanyi. Ndyèsè bwà kwikala kaaba aka. Ne—ne ncyà bushùwà ne bwà kukumbaja dileejiibwa dyà kùdì mpaasàtà wetù edi mbifwànyìne kukèngela nsòmbelu mulelèlà, kî mmwòmò anyi? Pa nàнку tufila butùmbi Kùdì Mukalenge bwà makolè Èndè ònsò manène a dyondopa ne luse Lwèndè lùdìYe mutupèèshe munda mwà bidimu byònsò ebi.

Mpindiyewu ndi ne ndambù wa mamanyisha a difila. Dyà kumpàla, twètù, Mwanèètù Wood ne Mwanèètù Roberson, ne twètù tudi baswè kunwèla bònsò twasàkidila bwà ditùsambidila dyènù, bwà lwendu lwenza lwà kakùyi bwalu bütwènzèkèkèle to. Tuvwa bakapìcile mu cikondo cilenga cyà kacya; bakenzè ànu matùku ànaayi ne citùpa, ngeela meeji, ne baalùkile kakùyi bwalu to. Mukalenge mmutùbènèshe ànu cyà bushùwà.

⁵⁰⁶ Mpindiyewu, tudi tumanyisha ne Mwanèètù Graham Snelling, ditàbuluja dyèndè adi, dicide ditùngunuka, lwà ku—ku ndekeelu kwà Mùsèsù wà Brigham kwàka, ku. . . mu cimenga eci. Nènku mu dilòlò dyà diisàtù dilwalwà edi. . . Ndi muswè kuya màalabà, paanyimà pàà diyiisha dyà ku madilu bwà umwè ùngààmanyishà mu katancì kakesè emu. Netùnùmanyishè mu diisàtù dilòlò. Tudi baswè kuyakù bu kasùmbù kàà batùmìibwe, bònsò, bwà kuya kendela Mwanèètù Graham kumpàla kwà kujikijayè masangisha èndè awu kuntwaku. Nè netùteetèku bwà kusangisha èkèleeziyà mujimà, twètù ne mùshindù, kàdi kuyakù bu kasùmbù kàà batùmìibwe bwà kusangila, bwà kwikalakù ne Mwanèètù Graham mu dimwè dyà ku masangisha èndè awu.

⁵⁰⁷ Nènku, mpindiyewu, mu mapingaja emu ku—ku nzùbu wa bitàlù ku Charlestown, kùdì—kùdì Màndàmù Colvin, uvwakù ùlwa musangu kampànda mu èkèleeziyà emu kùkaadi bidimu byàbùngì, ne bidimu makùmi mwandamutekète ne binaayi, mmushiyàngàne ne pànu makèlèlà awu bwà kuya kiikala ne Mukalenge Yesù. Nènku bìkèngela bwà diyiisha dyà ku citàlù cyèndè kwenjiibwadi mu dimwè, kùdì Révérend Mukalenge McKinney, uvwakù, kale wàwa, mpaasàtà wa èkèleeziyà wa ba-Méthodistes ku—ku Port Fulton kùkaadi bidimu byàbùngì, yèyè ùvwa mulundà wabò wa katàpùlà—katèèkà. Ne bìkèngela nkamukwàcishèku, mu dimwè amu, ku, ngeela meeji mpa dîbà ùmwè ne tusunsa makùmi àsàtù, ku—ku kazùbù kàà dikuukwila ku Charlestown, mu Indiana. Ne nwènù bònsò balundà

bàà fàmiyè wa Colvin nudikù bafwànyine, ndi mumanyè, mbafwànyine kwanyisha mpindyewu ànu ndambù wa mwoyi mukolè anyi bwà... dilabulanganakù dikesè dyà ku byanza. Bwalu tudi bônso bamanyè cidì cyôci aci, twètù bàkaadikù bapicilèpicile mu byôbi abi aba, mu bibandabanda, twètù biinè, ne bamanyè cidì kujimija kwà mulundà. Ne pa nànkù tudi... Mmulàadika mu kazùbù kàà dikuukwila aku patùdi twakulangana apa, ku Charlestown, mu Indiana. Nwènù bayèku mu mapingaja emu, mòna's, ncifwànyinekù kwanyishiibwa kùdi fàmiyè Colvin, ndi mutwishiibwe nànkù. Bààbúngì bàà ku bânà bààbò bàcìtu bàlwa mu tabernacle emu too ne mpindyewu. Ntu muswikèswike mabàkà, mujiikèjiike, mubàtüzèbàtüzè, pabwipi ne, ne fàmiyè wabò, mujimà. Ne pa nànkù Mukalenge Grayson, uvwakù kale wàwa mwena mutumba neetù kaaba aka awu, ki mujiiki wa bitàlu kuntwaku.

⁵⁰⁸ Ne pashishe eci, dilòlò edi, bu Mukalenge mwà kwanyisha, mwaba wutùdi twimanyikila mu dindà emu awu, ki wutwàteetè kwangacila dilòlò edi, mu dilonga dinène ditùdi tulonga mpindyewu edi. Nènku ngeela meeji ne ki cìwà mamanyisha, ku—ku dyànyi—dyànyi dimanya. Ne mu diisàtù dilwalwà edi mu dilòlò, mpindyewu, netùmanyishè pa bìdi bitàngila dilòlò ditwàya bwà kwikala ne Mwanèètù Graham.

⁵⁰⁹ Nènku tudi twakidila bilenga beenyi bônso bàdi batwëndèle. Ne tudi ne disànkà dyà kwikalakù neenù kaaba aka mu dindà emu, ne tulòmba bwà Nzambì ànùbènèshèku ne tètè mu nzùbu tètè pambèlu, mu búngì kabùyi kwamba, bwà didisangisha edi.

⁵¹⁰ Mwanèètù Cox mmufùme ku dingambila ne ndongolwelu wa difikisha mèyi kùdi batèeleji kàvwa wènza bimpè menemene to diinè díbà adi. Pàmwàpa, míngà misangu mbifùmìne ku mùshindù wùdi kuulu, citaleela cyàbúngì mu bipwidì byà mèyi mwàmwa. Ne byôbi biinè kabyèna ànu bimpè menemene to, twamb'eku twamb'eku, pa nànkù aci ncìdi mwà kwikala cicikèbe.

⁵¹¹ Pàndi mmòna mwanèètù wa bakàji musòmbe kaaba aka úndi mumanyè, Mwanèètù wa bakàji Arganbright, ndi... Kí mbimpè ne—ne byà bukàlàngà to, bwà kukonka nùnkù, kàdi ukàadikù mupetè nguumù yà kùdi Mwanèètù Arganbright kacya wàya kuntwaku anyi? Ndi njinga bikolè bwà kupetakù nguumù yà kùdiye pàtùdi ànu tupeta mùshindù. Ùdi ùsanganyiibwa mu Suisse ne mu Allemagne, mu masangisha kuntwaku ne Mwanèètù Tommy Hicks ne Paul Cain. Bu wèwè mwà kuumvwakù nguumù, wèwè Mwanèètù wa bakàji Ruth, wàmmaniyishakù dyàkàmwè, lùkàsà ne mwèbè mwònsò.

⁵¹² Mpindyewu, tabernacle mukesè ewu kèna ne byà buumambàlà abi to, kàdi tudi ne bwobùmwè. Katwèna ne twitabàayi to pa kuumusha Kilistò, katwèna ne mukenji to pa kuumusha dinanga, katwèna ne mukàndà to pa kuumusha

Bible. Ki Mukàndà wùmwèpelè wutùdiku pèètù bamanyè, ne cintu cimwèpelè citùdiku pèètù bamanyè ne, bwà citùdi naaci. Pàdi Mashi a Yesù Kilistò àtùkezula ku mpèkaatù yònsò, tudi mu bwobùmwe muntu ne mukwèndè, bantu bònsò.

⁵¹³ Mvwa mumòne, mu dindà emu, mùvwà bàmwè bàà kunùdi bafwànyine kwikala bumvwè mwanèètù wa balùme awu ùsambila. Yèyè ùvwa mwena Kàtòlikè, pa nàнку, anyi mwena Kàtòlikè kale wàwa. Nènku tudi ne bantu bàà mìshindù mishìilàngàne yònsò bàdi bàlwa kaaba aka. Ndi mufùme ànu ku dipetakù dyèsè, katanci aka, dyà kulabalangana ku cyanza ne mwanèètù wa balùme wa ba-Mennonites udi musòmbe kaaba aka. Nènku bàà mu ba-Mennonites, bàà mu ba-Méthodistes, bàà mu ba-Baptistes, ne beena Kàtòlikè, anyi bònsò bàdi baswè abu, bàlwe. Nènku tudi tubwela mu bwobùmwe pàmwe banyùngùlùkile mabènesha a Dìyi dyà Nzambi. Nkusòmbe kaaba aka Bantèmu bàà Yehowah ne bantu bàà mìshindù mishìilèshìilàngàne, nènku, bàà mu màngumba mashìilèshìilàngàne.

⁵¹⁴ Kale wàwa mvwa munangè (èè, ncicidi ànu munangè's) Wesètè. Ntu munangè tubalù ne ngombe. Ntu mukolèshìibwe ànu mu ferme, ne ntu—ntu mubinangè. Nènku tuvwa ne ciibidilu cyà kwenza dikùngwija dyà nyama, ne mvwa nya naayi. Ne tuvwa ne lupangu lwà ngombe. Ncyèna mumanyè nwènu bàà ku Esètè ní nutu bamanyè cidi lupangu lwà ngombe, anyi kanùtu bamanyè. Mpanùdi nubweja ngombe mu—mu diitu, bàdi ne lupangu bwà kuyìpangisha bwà kulaluka, mùvwàbò bàcibiikila, kwalukila ku bitùpà byà malaba mùdìbo bàmuna nyama ne bàdima amu. Yidi yidya mashinda, mwaba wùtùbo bàtòlwesha mashinda a didiishà dyà nyama mu movù wà mashika. Ne pashiishe kuulu kwà mukùnà, bàdi kàbidì ne mpangu yà ngombe, mùdìbo bàtápulula mikàjì yàbùngì ne milùme, ne bikwàbò. Bàdi bàcibiikila ne ndupangu lwà ngombe. Kàdi lupangu lwà ngombe lwà lunène lùdi mwaba wùdi mulami wa diitu mwimànyine pàdi ngombe munkaci mwà kupita apu.

⁵¹⁵ Nènku mpindyewu nkààdikù musòmbepù, misangu yàbùngì ditùkù dijimà, pa kabalu kaanyi apu, ne mbàtàngila pàvwà ngombe ayi yipita apu. Kùvwa kùbwela yà bimwènu byà mishindù mishìilèshìilàngàne yònsò. Kùvwa yìvwà yìbìikidiibwa ne nyà “Diamond.” Ne yimwè yà kùdìyi yìvwà yìbìikidiibwa ne nyà “Bar X.” Ne yimwè . . . Yètù twètù yìvwà yà “Tripod,” cintu kampànda cyenzè bu dibèndelà dyà baaSùkutù. Mulùmyànà uvwa ulondà, kwinshi aku, yèndè yìvwà yà “Turkey Track,” musòmbèle pa kabalù. Nènku yònsò ayi yìvwà ne bimwènu byà mishindù mishìilèshìilàngàne, bwà—bwà kujingulula ngombe yàbò pàvwàbò bàyipàtula apu.

⁵¹⁶ Mpindyewu, mulami wa diitu kàvwa yèyè ùjinga kumanya cimwènu civwàyi naacito, kàdi bwalu bùdi ne, mulami wa diitu ùvwa ùjinga kutàngila cimanyinu mu dici dyayi. Cyònsò

cìvwà cibwelamù, nànsha cimwènenù cyàci ciikàlè cyà mùshindù kaayi, bivwa bikèngela ikalè Hereford wa dimiinu dyà bushùwà. Kàvwa ùbwelamù pàvwàye kàyi Hereford to. Bìvwa bikèngela ikalè dimiinu dilaminyina pàtupù kàvwa ùpìtakù to.

⁵¹⁷ Ndi ngeela meeji ne, ditùku adi pààlwà Mukalenge, Yèyè kààkutèya ntèmà nànsha mikesè ku cimwènenù citwikalà naaci to, kàdi ku ní tudi bônso beena Kilisto balediibwe cyàkàbidi. Ncyà bushùwà. Ki dimiinu dilaminyina dyà Kilistò ndyòdi adi. Diteeta dyà Mashì ndyàtùjaadikà, tudi bônso beena Kilisto. Nènku pìikalàbi ne mùshindù awu ngutwikalà kwòkù *aku*, s'mbipiciibwe ne twètù biikàlè mùshindù awu pànwapa. Kanwènaayikù nwele meeji nànkù anyi? Ki mùdibi, tudi bônso twanyisha bwobùmwe bwà kùdi èkèleeziyà mishiilèshùlàngàne yònsò.

⁵¹⁸ Mpindyewu tudi tulonga mu Mukàndà ewu mubènèshiiibwe wà Ebèlù. Mwanèètù kampànda mbimusànkishe bikolè mu mùshindù wà ne mmwangàte mikàbà yà mèyì ne ùdi wènzèlapù mukàndà wà miyiiki yà dilongesha.

⁵¹⁹ Mpindyewu netwikalè mwà kafika, àbidi aa, ku nshapità wa 11. Tudi tutèkemena ne netùpicishilèpu movù wà mashika, pa nshapità wa 11 awu. Bwà yònsò wa ku bantu abu, tudi baswè kwalukila mu Mukàndà ne kuswikakaja pàmwe Mifundu yònsò nkòong. Ki cìmvwà muswè kwenza. Ndi ncyènza ndambù, pa bìmwè byà ku byòbi ebi, byà ku nshapità yikaadi mipite eyi, bwà kutwàngaja Mukàndà mujimà. Bwalu, nudi numòna's, Mifundu yidi ne cyà kujaadika Mifundu.

⁵²⁰ Ki bwà cinyì, kwòkù dibèngangana dyà mèyì, mùdi muntu mufwànyine kwela meeji ne Mifundu yidi yibèngangana munkaci mwàyì, aci ndipanga. Kakwènakù Mufundu wùbèngangana ne Mufundu nànsha. Di—dibèngangana pàmwàpa ndyà pàdiWu wùbèngangana ne wètù mùshindù wutùdi tuWùtàngila, kàdi kaWèna wùbèngangana ne Wòwò mwinè to. Ndi mu mudimu wà bwambi ewu, ngiipacila mpindyewu bidimu makùmi àbidi ne bisambòmbò, kàdi kacypù, musangu nànsha wùmwe, ncitukù mwanji kusangana cintu kampànda nànsha cìmwè mu Bible cibèngangana ne cikwàbò cidì cifunda mu Bible to. Ne ndi mumanyè ànu ne kacynamù to.

⁵²¹ Nènku leelù ewu tudi tulonga mu umwe wa ku nshapità yà mitàmbe kubèneshiiibwa yà Ebèlù, nshapità wa 7. Nènku kwòkù muntu kàyi ne Bible to, kàdi muswè kwenda kulondesha bitùdi tubala, tudi bafwànyine kwikala ne disànkà dyà kukutwàdila Bible bu wèwè ànu mwà kwela cyanza muulu. Nèndombè umwe wa ku bakùlù, muntu kampànda, bwà àlwe kaaba aka àngatè yimwè. Muntu nyawu mwelè byanza muulu paanyimà pàapa. Nènku twasàkidila, mwanèètù wa balùme. Nènku wèwè ujinga Bible, elà ànu cyanza muulu cyanààna, nènku nebàkutwàdilèye.

522 Mpindyewu, mùshindù wùmwèpelè wùdiku èklèleeziyà mwà kwibakiibwa, mùshindù wùmwèpelè wùdi muntu mwà kwikalà ne Diitabuuja, kî nku dingumba dyèndè to, kî nku didiswikà dyèndè to. Kàdi Diitabuuja dyèndè didi disòmba kî mpa tèòlòjì wa mmwènenù yà muntu kampànda to, bwalu aci, mu mùshindù kampànda, cidi cyònsò nkòong ànu muntu. Kàdi mùshindù wùmwèpelè wùdiku Diitabuuja mwà kupeta ciikishilu cyàdi cyà kaciyi tuseku, mpa Díyì dyà Nzambi didi kadiyi mwà kunyungishiibwa ne kadiyi dishintuludiibwa. “Diitabuuja didi difuma ku ditèeleja, ku ditèeleja dyà Díyì.” Mùshindù awu ngùdidi dikwàta. Nènkù—nènkù pàdi Diitabuuja ditèelejiibwa ne diitabiibwa, didi dishindamijiibwa kashidi. Cintu nànsha cimwè kaciyènakù mwà kudinyungisha kàbidi to, nànsha bibànde nànsha bipwekè. Cintu nànsha cimwè kaciyènakù mwà kushintulula Diitabuuja adi to. Anjì elàayibi meeji ku bwalu abu. Udi mwelè lwongò, ne kwèna ushintulukakù kàbidi to, mu bikondo too ne mu Cyendèlèlè. Udi mwelè lwongò kashidi: “Bwalu Nzambi, ku mulàmbù wùmwèpelè, mmupwàngàje kashidi aba bàdi bajidiibwe, anyi babiikidiibwe.”

523 Ne Diitabuuja didi ne mwaba munènè be mu mwena Kilistò, mu nsòmbelu wa mwena kwitabuuja, mu mùshindù wà ne didi mwà kwangata kaaba kàadi ku luseke lwà lukità lwà mu bitoci anyi kumutù kwà mushèètè wà bafwè, mùdi mwànà wa pambidi wa mushinga mukolè anyi munanga webè muumuke mu mwoyi ewu muyè dyàmwàmwa. Nènkù mwikàle ne lutàngilu lwà dísù dyumisha dyà mukankù, ùdi mwà kutàngila kùdi Ewu wákamba ne: “Mémè ndi dibìikà dyà ku lufù ne Mwoyi” awu. Nènkù bàdi bàpwa mwoyi bintu bikaadi bipite. Bàdi bàkolesha batàngile ku kiipàcilà kàa dibìikila ditumbùke.

524 Ndi ne disànkà be mùdi Nzambi mulongòlòle byà nànkù, ne mubìvwijè dipà dyà kùyi ufuta kantu to kùdi bònsò. S’ki cidi cikèngela bwà maèkèleeziyà kwikalawù. *Maèkèleeziyà* kî mbwena kwamba ne mmàngumba anyi mmalngolodi to; mbwena kwamba ne: “Bisumbu byà bantu, byà beena kwitabuuja, bàdi badisàngishe mu bwobùmwe bwà Díyì.”

525 Nènkù mu dilongesha dyà dikèmesha dyà Pòlò Munsantu edi, mu myaba yitùdi bashindàmijile bitùdi bambè, mu nshapità yà kumpàla ayi, yèyè mmwakùle mu mùshindù musungùlùke pa Bunzambi butàmbe kutumbuka bwà Mukalenge Yesù ne Yèyè ùvwa Nganyì. Kilistò ùvwa Nzambi, muvwijiiibwe mu mùshindù wà ne bantu bàvwakù mwà kuMuumvwa ne byanza ne bàMulenga, ne—ne bàbwela Nendè mu bwobùmwe. Kilistò, Mukalenge Yesù, ùvwa mubidi wùvwà Nzambi musòmbèlemù: “Nzambi wàkavwijiibwa mubidi ne wàkasòmbela munkaci mwètù.” Timòtè wa Kumpàla 3.16: “Kakùyi dikòkangana to bwalu busokoka bwà difwànà dyà Nzambi mbunène, bwalu Nzambi wàkamwèneshiibwa mu mubidi.”

526 Yèhowàh Munène awu wàkatùùluka ne wàkavwijiibwa wa bàlenga ne byanza, mu kusòmbela kwà mu mubidi wà Mwan'Èndè Sungasunga, wàmba patòòke ne ùpungisha bàà pa buloba ne Yèyè mwinè. Nzambì kàvwa cìngà cintu to. . . Kilistò kàvwa mushààdìle ku Nzambì mu kantu nànsha kàmwè to; ne—ne Nzambì kàvwa mushààdìle ku Kilistò mu kantu nànsha kàmwè to. Bàbìdì abu pàmwè mbàvwà bènza Bunzambì mu mùshindù wà mubidi, mupwekèshìibwe ndambù kùdì Banjèlo, bwà Wàmòna mwà kukènga. Banjèlo kabèena mwà kukènga to. Yesù ùvwa Ntentà uvwa Nzambì musòmbèlemù.

527 Bible mmwambè, mu nshapità wa 7 wa Byenzeni byà Bàpostòlò, ne: “Ntentà, ne mulàmbù mwosh-. . . ne milàmbù yà dyosha Wèwè kwàkayiswa to, kàdì WàkaNdongolwela mubidi. Ki bwà cinyi Mutàmbe bunènè wa mu Dyulu kàtu ùsòmbela mu ntentà myenza ne byanza to, kàdì WàkaNdongolwela mubidi,” aci mu disòmbela dyà mu ntentà anyi disòmbela dya mu bwobùmwe ne muntu.

528 Nzambì mwanishe, patùdì ànu tujikija nshapità ewu, anyi tujikija Mukàndà ewu, tudi baswè kwalukila bwà kwangata Mukàndà wà Luutà ne kuleeja mwómù amu mwàkalwà Nzambì cilongo kutùdì, bwà kupungisha bajìmine ne Yèyè mwinè ne kwikala mu bwobùmwe ne kulwa umwe wetù. Mupikudi ùdì ne cyà kwikala cilongo, ne mùshindù wùmwepelè wùvwà Nzambì mwà kulwa cilongo kutùdì, ngwà kulwa umwe wetù. Pa nàнку, Yèyè kàvwa mwà kulwa Mwanjèlo nènku kwikala cilongo kùdì muntu nànsha.

529 Makèèlèlè dilòòlò pàmvwà ngaakula ne mwanàanyi wa balùme uvwa ne mwoyi mucibùlùke, mwena dyanyi ewu, mwena mamwèndè udi mufùme ku difwà awu, kwambayè ne: “Kaa, Mwanètù Bill, ngeela meeji ne yèyè m' Mwanjèlo dilòòlò edi's.”

530 Mèmè ne: “To, Earl. Kàadyàkwikalakù Mwanjèlo to. Yèyè mmuntu mukàjì, dilòòlò edi, ànu mùvwà Nzambì mumwenzè amu, ki mwikalàye misangu yònsò, kàyikù Mwanjèlo to.” Nzambì ùtu mwenzè Banjèlo. Kàtukù mwenzè bantu bwà kulwabò Banjèlo nànsha. Yèyè wàkenza Banjèlo ne bantu. Pa nàнку bantu kabàadyàkwikalakù Banjèlo to, ne Banjèlo kabàadyàkwikalakù bantu nànsha. Nzambì ùtu mubènzè bashiilàngàne.

531 Mpindyewu, mu kulwa kwà Kilistò mubidi bwà kupikula dyàmwàmwà dinène kùvwà muntu mudishindile aku amu, ne dibènga-kufwà ku mpèkaatù dyàkatùùlukà adi, Nzambì wàkatùùluka ne wàkangata mmwènekèlu wa muntu, ne wàkalwa cilongo kutùdì, bwà Wàmòna mwà kwambula mpèkaatù yètù ne lufù lwètù.

532 Ne mu cimwè cyà ku bifwànyikijilu bitùvwà tufila, mu màleesònà àkaadi mapite aa, ànu mwaba mukesè cyanàànà wà kushindamijila bitùdì twamba bwà mwenyi wàmònakù mwà

kuumvwa. Nzambi, mu njila Wènda ùbànda ku Kàlvariyò, bu mùvwà kalonda kàà lufù pambidi Pèndè, ne kènda kàvuma vuumvuumvuum mu nyùngulukilu Wèndè, ki ndekeelu wa byònsò kuMusùmakù too ne mwàkafwàYe. Wàkafwà mu mùshindù wà ne díbà dyà muulu dilekèle kufila nsèsà yàdi. Wàkafwà mu mùshindù wà ngondo ne mitootò kabiyi mwà kufila bukènkè bwàbi to.

533 Anyi, mùshindù mwinè wàkakèngelàbi bwà kwenzaYè ciinè aci, bwà kupàyika kalonda kàà lufù aku's! Bu ne Yèyè ùvwa muntu wa kàyi ùfwa to, bu ne Ùvwa mu Tèòfàní, ànyi mwikàle mu Nyumà, lufù kalùtu ne bukòntononyi pa abi to. Byàkakèngela bwà kulwa musunya, bwà Wàmòna mwà kwangata kalonda kàà lufù aku. Kàdi pàdi lubùlùbùlù anyi cìshì kampànda cìdi cìsùmanganà eci, musangu wùdici anù cìsùma mu ndòndò, kacyàdyàkusùmakù kàbidi to. Cìdi cìshiya kalonda kààci aku mu mubidi awu.Nènku ki cìvwà Kilistò mulw-... anyi Nzambi mulwè. Kilistò ùvwa musòmbèle mu mubidi, bwà Wàmòna mwà kudìpàyika kalonda kàà lufù mu mubidi Wèndè Sungasunga. Nènku pààkapàtukà lufù mu Yèyè ku nkùrusè, lwàkashiya kalonda kààlù aku, kalwènakù mwà kusùma kàbidi mwena kwitabuuja to. Lùdi mwà kwenza mutooyi wà divuma awu, lùdi mwà kwenza divuma ne mifuunu, kàdi kalwèna mwà kusùma to. Kalwèna ne kalonda to.

534 Pòlò Munsantu munène awu, mu lwendu lwèndè lwà mutàngile ku lufù, wàkeela lubilà lukolè wàmba ne: “Éyì lufù, kalonda kèèbè kàdi penyì? Ne wèwè lukità, bucìmunyi bwèbè bùdi penyì? Kàdi twasàkidila kùdi Nzambi ukàadi mumanè kutùpèeshila bucìmunyi ku Mukalenge wetù Yesù Kilistò, bwalu ne lufù ne lukità byònsò bikaadi bijìmije bukolè bwàbi.”

535 Mpindyewu, pashiishe, mu dyàlumingu dishàale tuvwa bangàte: “Tushiya maalu a cibangidilu a dilongesha dyà Kilistò,” mu nshapità mwi6, twètù kubala eci ne, “tùyaayi kumpàla batàngile ku bupwàngàne.” Ne tùvwa basangàne ne bantu leelù ewu mu èkèleeziyà yàbùngì, pàmwe ne Branham Tabernacle ne mikwàbò mishilèshilàngàne, tudi tutàmba kweyemena dilonga dipitèpìte bùngì pa maalu a ntwàdijilu a Kilistò ne: Yèyè ùvwa Mwànà wa Abraham, Ùvwa mwànà wa—wa *Kampànda*, ne bikwàbò, byà dilondangana dyà bankambwà adi. Kàdi Bible mmwambè ne: “Tùteekàayi ku luseke bintu abi, ne tùyaayi kumpàla batàngile ku bupwàngàne.”

536 Cyà kumpàla udi ne cyà kwanji kumanya dilongesha, ne pashiishe udi ne cyà kumanya bintu byònsò ebi; pashiishe tùbitèekaayi ku luseke, mùdiye mwambè, byà dibìikà dyà bafwè, ditentekelangana dyà byanza, mabàtiiza, ne bintu byònsò bifwè byà Nzambi abi. Kàdi pààbi, kabyèna—kabyèna ne Mwoyi mu byòbì amu to. Kàdi Èkèleeziyà leelù ewu ùyaaya ànu ku byòbì bintu abi ne: “Kaa, twètù's tudi twitabuuja Bunzambi bwà Yesù

Kilistò.” Èyowà. Bushùwà. “Tudi twitabuuja dibàtiiza dyà mu màyi.” Èyowà. Bushùwà. “Ditentekelangana dyà byanza.”

⁵³⁷ Pòlò mmwambè ne: “Netwènzè byònsò ebi bu Nzambi mwà kwanyisha. Kàdi nànsha biikàle ne biinè byònsò abi, tùbitèekaayi ku luseke mpindyewu, ne tuyaayi kumpàla batàngi ku bupwàngàne.”

⁵³⁸ Mpindyewu, èkèleeziyà kèna mwà kuvwijiibwa mupwàngàne ku malongolodi nànsha. Ùdi ùtàmba kuya kule ne Nzambi, dîbà dyònsò, ànyì bàtàmba kuya kule muntu ne mukwèndè. Tudi twela mikàlu, tudi tuditàpulula, byenzè bu ne katwèna ne Diitabuuja to. Kàdi pashìishe patùdi tushìya maalu a cibangidilu a dilongesha awu, twètù batùngùnùke tuya batàngile ku bupwàngàne, dîbà adi tuntu twà tukesè tukesè atu tùi tùshààla katùyì twà mushinga wàbùngi to.

⁵³⁹ Tudi tubwela mu malanda kampànda, ne tusangana ne mùshindu wùmwèpelè wutùdiku mwà kulwa bapwàngaja ngwà kwikala munda mwà Kilistò. Ne tudi tusangana dîbà adi, ku malongesha a Bible ne, mmunyi mutùdi tubwela mu Kilistò; kî nku dibàtiiza dyà mu màyi, kî nku ditentekelangana dyà byanza, kî nku dilongesha to. “Kàdi ku Nyumà umwe nkutùdi bònsò babàtiijìbwe mu Mubidi wùmwe ne tulwa bapwàngaja ku dikènga Dyèndè.” Dîbà adi, tudi ne mmwènekelu mushiilàngàne. Tudi twela meeji bishiilàngàne. Tudi twenza maalu bishiilàngàne. Tudi ne nsòmbelu mushiilàngàne. Kabiyi ne mbwalu butwènzeja anyì ne tudi bàà mu èkèleeziyà kampànda to, kàdi bwà “dinanga didì Nzambi mupòngòlòle mu myoyi yètù ku Nyumà Mwìmpè,” didì ditùvwijà beena-mwàbò bàà Bukalenge bwà Nzambi, dîbà adi kakwèna dìngumba anyì mikàlu mu cyòci aci to. Tudi bònsò Mubidi munène wùmwèpelè.

⁵⁴⁰ Mpindyewu tudi badilongòlòle bwà kubwelela pa dileesònà dyà mu dindà emu edi, mu katancì kakesè emu. Cìkwàbò cintu cìmwèpelè kùndi muswè kufika kaaba aka, cìdi, ncyà ne, Pòlò mu kwakula kwèndè kwà mu Mukàndà ewu, mu nshapità wa 7, anyì nshapità mwi6, tudi tusangana kaaba aka ne tudi tuvwiijiibwa bapwàngàne mmu Kilistò. Pashìishe mu mvensà wa 13 wa nshapità mwi6, kaaba kakesè cyanàànà kàà kushìndamijila bitùdi twamba.

Bwàlu Nzambi pààkenzelàye Abraham mulayi, bu mùvwàye kàyi mwà kudìcipila ku kampànda wa mutàmbe bunène, wàkadìcipila ku yèyè muwinè,

Nzambi wàkadìcipila ku Yèyè muwinè, bwàlu Kàvwa mwà kudìcipila ku kampànda mutàmbe bunène to.

⁵⁴¹ Mpindyewu tudi baswè kwalukilakù cyànyimà. Twànjàayi kuya ku Ngalàtiyà bwà katancì kakesè cyanàànà. Buulùlaayi ku Mukàndà wà Ngalàtiyà, nwàngatè Ngalàtiyà 3.16. Nènku netùbalè apa bwà katancì kakesè cyanàànà, pa cyàkadìcipilàYe aci.

Mpindyewu kùdì Abraham ne dimiinu dyèndè nkwàkafidiibwà mulayi. Yèyè kàakamba ne: Ne kùdì mamiinu to, bu ne ngààbùngì; kàdì mbu ne ndimwèpele, . . .kùdì dimiinu adi, dìdì diikàle Kilistò.

542 Mpindyewu bu nwènú mwà kumòna, mu kubala kwà aci ne ntèmà mpindyewu, panùdì nubala apu.

. . .kùdì Abraham ne dimiinu cyèndè (ku bùmwè) nkwàkafidiibwà milayi (ku bùngì).

543 “Abraham ne Dimiinu dyèndè.” Mpindyewu, Dimiinu dyà Abraham òvwa òimwèpelè, òivwà diikàle Kilistò; mu cimfwànyì, Izàkà.

Kàdì Abraham ùvwa ne bânà bààbùngì. Ùkaavwa ne umwe kumpàlà kwà kupetayè Izàkà, cìvwa cileejà cilèmà cyà bupidyà bwà Sarah uvwa muswè bwà Anà kulelayè mwànà awu, wèla meeji mukàvwàye mutàmbe kukùlakaja, bwà Nzambì àcingulukè ne ènzè mukwàbò mùshindù mushiilàngàne ne mùshindù wùvwàYe mulayè bwà kucyènza.

544 Kàdì Nzambì ùtu ànu ùshàala mukwàte ku mulayi Wèndè. Nànsha wòwò wùmwèka mutàtàkàne bìshi, Nzambì ùtu ànu muswikibwe ku mulayi Wèndè. Kàdì Sarah yèyè wàkeela meeji ne pàmwàpa ùvwa mwà kwenza ne Anà, anyì, Hagàà's wè, mwena mudimu wèndè mukàjì awu, bwà àlelelè Abraham mwànà, bwà yèyè àmwàngatè. Ki mwànà kulwayè Ishàmèlà, uvwa dyèbà mu musunya awu, kubangila ànu piinè apu too ne patùdì twakulangana apa. Úcìdì ànu dyèbà mu musunya, bwalu ki kwàkapàtukilà Bàlabù, ne bòbò bàtu misangu yònsò ànu mùshindù awu.

545 Mpindyewu, dìbà dyònsò dyùdì ubènga kwitabuuja Dìyì dyà Nzambì dyà pa bùtookà kàdì witaba mùshindù mukwàbò kampànda, necìikalè dyèbà mu musunya wèbè kubangila ànu apu. Angàtà ànu cìdì Nzambì mwambè aci. Yèyè mucyàmbè, ànu aci ncìdìYe muswè kwamba. Kaa, Dìna Dyèndè dibeneshiibwè's wè! Angàtà ànu Dìyì Dyèndè nkààyaadi.

546 Cìdì citeetà kucìnguluka nànsha ciikàle cinganyì, ne: “Èè, mu bulelèlè Dyòdì kì ndiswè kwamba Aci to.” Dìdì òiswa kwamba ànu cìdìDi dyàmba aci, pàdì Nzambì ùfila mulayi.

547 Mpindyewu bu twètù mwà kutèèleja ne ntèmà.

. . .Abraham ne dimiinu dyèndè nkwàkafidiibwà milayi. . .

Òimwè òivwa n'Dimiinu, ku bùmwè, ne mikwàbo yìvwa mmilayi. Kùdì milayi mipìte pa wùmwè, ne bantu bapìte pa umwe bàbadiibwa mu Dimiinu dyà Abraham adi. Nwamònu anyì? Kùdì Dimiinu òimwèpelè, kàdì bantu bààbùngì bàà mu Dimiinu òimwèpelè edi. Nwamònu anyì? Kayìvwa ànu bwà Abraham nkààyèndè, anyì bwà Izàkà nkààyèndè to. Kàdì. . .Yìvwa bwà Dimiinu dijimà dyà Abraham. Milayi ayi

yàkafidiibwà kùdì dimiinu ne dimiinu dyònsò muntu-nkààyà wa Dimiinu adi. Nwacyũmvù anyi?

548 Ki bwà cinyi, twètù, biikàle bafwè mu Kilistò, bilondèshile Mifùndu, tudì tuvwàla Dimiinu dyà Abraham ne tudì bapyànyi bilondèshile mulayi. Kí nku diya kashààla wa mu èkèleeziyà kampànda to, anyi dikwàtakaja dyà bintu bifwè, anyi—anyi bikwàbò to. Kàdi ku diikala balediibwe ku Nyumà wa Kilistò, tudì Dimiinu dyà Abraham, ne tudì bapyànyi pàmwè Nendè mu Bukalenge.

549 Dìbà adi, tudì tutùngunuka ne kubala, dìbà adi, tuya ndambù kumpàla mpindyewu ne: “Nzambi wènta mucipù.” Mpindyewu mvensà wa 17 wa nshapiità mwí6.

Ki bwà cinyi Nzambi, pàakaswàye bwà kutàmba . . .

. . . Nzambi, pàakaswàye bwà kutàmba kuleeja kùdì bapyànyi bàà mulayi dìbènga-kukùdimunyiiibwa dyà dipàngadika dyèndè, wàkadishindikila ku mucipù;

550 Kaa, twánjàayi kuminakù matè ndambù wa tusunsa mpindyewu. “Nzambi ütàmba kuswà.” Kí nnè bìvwa bikèngela bwà kucyènta Yè to, kàdi bwà kuvwija cintu eci cyà bushùwà menemene.

551 Mpindyewu, tukàadi bamanè kusangana ne Nzambi wàkalwa mubidi, kusòmbela munkaci mwètù, mwàkaDimwèneshàYe kùdì bàà pa buloba. PàakasanganàYe mukàji awu mu masandi, wàkamba ne: “Ncyèna—Ncyèna nkupiiisha to. Ndàaku, kwènji kàbìdì mpèkaatù to.” PàvwàYe ùsangana babèedi, Úvwa wènta maalu ànu mùvwàbi bikèngela kwenzaYè, bwalu Úvwa Nzambi, ne Úvwa—Úvwa wòndopa babèedi abu. Úvwa ùbiiisha bafwè. Úvwa úfwa luse ku mpèkaatù. Nànsha yòyi miikàle yà bishi, ne nànsha yòyi búngì kaayi, ne nànsha bóbò batwè cimpingà cyà bishi, Úvwa ùbàfwila luse, nànsha bishi, piikalàbi ne bàvwa baswè kulwa kulòmba.

552 Mpindyewu tàngilàayi. Piikalàbi ne Nzambi wàkenza maalu mu cikondo kampànda mu bwalu kampànda, ne bwalu bùmwebùmwe abu bwòbù bujuukè cyàkàbidi, bikèngela Ènzè bwà musangu mwibìdi awu mwàkenzàYe musangu wà kumpàla bwà cyanààna Údi ne kàsungànsungà. Nwamònu anyi? Nànsha wèwè mubi wa bishi mu mpèkaatù, nànsha wèwè mulwè wa ciipanshi bishi, bikèngela Akwenzèlè mwàkenzelàYe muntu mukàji uvwa mudishinde awu bwà cyanààna Wàkenza bibi musangu awu. Diditwàlà dyà Nzambi ki Mupersona Wendè, ne cidìYe mu diditwàlà Dyèndè adi ki cidì cyàmba patòoke Mupersona Wendè.

553 Nènku ki mùdì wèwè, mu diditwàlà dyèbè mu nsòmbelu webè, cidì cyàmba cyùdì. Mutùvwà bacyàngate bacilongè, kùkaadi dileesònà dimwè anyi àbìdì, ba-Méthodistes bàvwa bóbò baswè kwikala bàmba patòoke ne: “Paùdì wela mbilà, udi Nendè.” Beena Mpenta bàdi bàmba ne: “Paùdì mwakùle

mu myakulu, udi Nendè.” Muzakadi mmwambè yèyè ne: “Paùdì uzakala, udi Nendè,” bazakadi bàà mu Pensylvanie abu’s. Kàdi tudi tusangana ne bônso bàdi mu ntùpàkànyì. Nsòmbelu webè’s ngudi uCyàmba patòòke. Buumùntù bwèbè mbùdi bwàmba cyùdì. Muntu ùtu ùmanyikila ku byenzedi byèndè, ne nsòmbelu webè nànsha mwikàle wa bìshi.

554 Nukàadi bumvwè kaabwalu kàtùbo bàlonda ne: “Nsòmbelu webè ùdi wàkula ne díyì dikolè, mu mùshindù wà ne ncyèna mwà kuumvwa mèyì èbè to.” Pa nàнку cyònsò cyùdì aci, ki cyùdì. Nsòmbelu ùdi nendè ngudi uleeja mùshindù wà nyumà udi munda mwèbè.

555 Ne díbà adi udi mwà kutentula cintu cibì, ànyì, kutentula cintu cimpè, mùndì mwà kwamba. Udi mwà kutentula mwena Kilistò. Kàdi, àbidì mmale àsàtù mmìpi, nekùlwe cikondo cyà diteeciibwa dikolè, díbà adi necileejè cyùdì. Bukolè bwà mùnyòdolò mpa dinungu dyàwù didì ditàmbe kuteketa.

556 Pààkeediibwà Kilistò Mwànà wa Nzambi ku diteeta, cyàkaleeja civwàYe. Cyà bushùwà. Pawèdiibwà ku diteeta, necijaadikè cyùdì. Nsòmbelu webè ùdi misangu yònsò ànu ùleeja cidì munda mwèbè. Àbidì mmale àsàtù mmìpi, ikàlà mutwishiiibwe mpèkaatù yèbè ní kayàakukupeta. Nènku ki citùdì tuteeta kwamba ncyòci aci.

557 Yesù mmwambè, mu Yone Munsantu 5.24 ne: “Ewu udi utèeleja,” kí ng’ewu udi uzakala, ewu udi wakula to, ewu udi. . . “Ewu udi utèeleja Díyì Dyànyì, ne wítabuuja Yéyè udi muNtùme, ùdi ne Mwoyi wà Cyendèlèlè, ne kàadyàkupitaku ku cilumbulwidi to; kàdi ùmùku ku lufù wàyi ku Mwoyi.”

558 Ndiitabuuja dyèbè. Ne diitabuuja dyèbè, dijìkwila ku mishikù yèbè, didì dimwèneshiibwa kumpàlà kwà bantu bàdi mwà kutèeleja, kàdi nsòmbelu webè ùdi bwàshì kumpàlà kwà bônso. Nàнку, nànsha wèwè uteeta bwà kwenza *cikampànda* ne kwenza *cikansanga*, kabyàkukùmbanakù to. Bikèngela cìikalè mu wèwè amu. Ki mùsà mulelèlè wà bwalu mu kaabujimà ngwòwò awu. Diitabuuja dyèbè sungasunga mu Kilistò mubiike ku lufù awu, bu Musùngidi webè; ne Yéyè ùdi ku dyàbalùmè dyà Nzambi, wènza pa kaaba kèèbè mu dindà emu, mùdì wèwè wenza pa kaaba Kèndè pànwapa bu ntèmù. Bùdi ntèmù naabù mbwà kwenza bwalu pamutù pàà muntu kampànda, kukwimanyina bu ntèmù. Ne pàdi nsòmbelu webè ùleeja pànwapa cidì bujaadiki bwèbè mu Kilistò, ùdi ùleeja kwàka ne ùleeja pànwapa. Ne Yéyè ùdi kuulu kwàka, mùdì cidìYe bwèbè wèwè, ùleeja ne kwàka ne pànwapa. Pa nàнку wèwè udi. . . Ku diitabuuja dyèbè, nkùdì musùngidiibwe, ne ànu ku dyòdì nkààyaadi. Pa nàнку, masaluka, mavwayila, milòwù, cintu kanà cyònsò, kabyènaMù ne kaaba nànsha kakesè to. Mpindyewu, kí. . .

559 Mpindyewu, kanwèdi meeji bibi to, bwà ne mèmè ncitu ngiitabuuja mavwayila awu. Ndi ngiitabuuja cyà bushùwà. Kadi citùdi twamba mpindyewu, tuteeta bwà kwelesha miji mu mitù yà bantu bàà leelù ewu aba, kî mmavwayila nànsha. Dyabùlù mmwangàte bintu abi kàdi kutombola bantu, ùbàfikisha ku dyeyekela kwàbò kwà Cyendèlèlèlè kùyaayàbo pa disaluka kampànda. Dyela dyà mbilà, dyakula dyà mu myakulu, diya dyà mu èkèleeziyà mu dyàlumingu dyònsò, dyenza dyà maalu bu mwena Kilistò, abi kabyàkwikala ne bujitu nànsha bukesè mu ditùkù adi nànsha. “Ànu muntu mulediibwe cyàkàbìdi.” Ne nsòmbelu webè ngudi ùleeja cyùdi munda amu, wamònu’s, kî mmasaluka èbè awu to.

560 Udi mufwànyine kwikala ne mashi mu byanza, udi mufwànyine kwakula mu myakulu, udi mufwànyine kwondopa babèedi, udi mufwànyine kutùntumuna mikùnà ku diitabuuja dyèbè adi, cibi mucikàle ànu cintu cyanàànà. Kolintò wa Kumpàla 13. Nwamònu anyi? Bikèngela ciikalè cintu kampànda cyenzekele ku Dilediibwa didi difùma kùdi Nzambi, ne Nzambi ùbweja Dilediibwa dyà cyàkàbìdi munda mwèbè, ne ùkupèesha citùpà cyà ku Yèyè mwinè. Dìbà adi bintu abi bìdikù. Udi cifùkiibwà cipyacipyà. “Ndi mbàpèesha Mwoyi wà Cyendèlèlèlè.”

561 Tudi balongè mwakù “wa Cyendèlèlèlè.” *Kashidi* n’“cipòlò cyà cikondo.” *Cyendèlèlèlè* nkashidi, kashidi ne kashidi, kàdi kùdi Cyendèlèlèlè ànu cimwèpelè. Nènku tudi tusangana ne wèwè udi upeta Mwoyi wà Cyendèlèlèlè, ne mwakù awu mu cyena Ngelikà wùdi *Zoe*, wùdi wùmvwija ne “Mwoyi wà Nzambi.” Nènku udi upeta citùpà cyà Mwoyi wà Nzambi, wùdi wùkuvwija mwànà wa nyuma wa Nzambi, ne wèwè udi wa kashidi ànu mùdi Nzambi wa kashidi amu. Kwèna ne ndekeelu, ne mwaba wùdi wimana to, bwalu kùvwa ne mwaba wùvwà mubangile to. Cyònsò cidì ne ntwàdijilu cidì ne ndekeelu, ne cidì kaciyi ne ntwàdijilu kaciyèna ne ndekeelu to.

562 Mùshindù mwinè wutùdi banangè Dìyì dyà mushinga mukolè adi’s wè! Mùvwàbi bikèngela bwà mwena Kilistò kwikalayè mushindamijila mu diitabuuja dyàkapèeshàbo bansantu musangu wùmwè cyendèlèlèlè, bwà kàyi ùtànkaajijibwa, wàtwa eku wàtwa eku, ne ùkaswikakana ne èkèleeziyà mishiileshiiàngàne. Èkèleeziyà yònsò ùdi muswè kwikala wa mwómò awu bìdi ànu bìmpè, pawikalà mwena Kilistò. Kàdi dyàmbedi anjì tèeka cintu cyà kumpàla, cidì ciikalè Dilediibwa adi didi dikuvwija cilongo cyà Nzambi, mwàkalwà Nzambi cilongo cyèbè amu.

563 Yèyè wàkalwa cilongo, bwà Wàmòna mwà kukubiisha ku lufù. Kumpàlà kwà kukubiisha Yè ku lufù, bikèngela Àkupèeshè Mwoyi wà Cyendèlèlèlè. Dìbà adi kukèngelabi bwà Nzambi àlwe cilongo, bwà kwangata lufù, bwà kukubiisha ku lufù. Dìbà adi bìdi bikèngela ùlwe cilongo kùdi Ye, bwà ùbwelè mu dibiishiibwa

dyà ku lufù. Nwamònu cidici anyi? Cidi ànu dishintakaja cyaààà. Nzambi wàkalwa wêwè, bwà wêwè wamòna mwà kulwa Nzambi. Nwamònu anyi? Nzambi wàkalwa citùpà cyà ku wêwè, musunya, bwà ku ngàsà Wendè wêwè wamòna mwà kulwa citùpà cyà ku Yèyè, kwàjiki, bwà kupeta Mwoyi wà Cyendèlèlè.

564 S'ncimfwànyì cilenga be, ne, kaa, tudi bacinangè.

Mpindyewu, Nzambi, pàakaswàye bwà kutàmba . . .

565 Kàvwa mwenzèjiiabwe to, kàdi Wàkaswà bwà kucyènza. Ndi ne disànka be bwà bwalu abu, kàdi nwènù, bwà ne Nzambi wetù ngudi muswè? Tàngilàayi. Kàdi bu ne Yèyè—kàdi bu ne Yèyè kàvwakù ne mwoyi mule? Mamuma a Nyumà àdi cinyi? Dinanga, disànka, diitabuuja, ditalala, mwoyi mule. Ki citùpà cyà Nzambi cidi munda mwèbè ncyôci aci. Ne cidi mwà kutwàlangana, nutwàlangana muntu ne mukwèndè. Kufwilangana luse muntu ne mukwèndè, mùdi Nzambi bwà Kilstò ùkufwila wêwè luse amu. Nyumà wa Nzambi munda mwèbè ùdi ùkuvwija mùshindù awu. Ne pashiishe pàvwà Nzambi pànu pa buloba ne mulwè wêwè, mulwè mpèkaatù, bwà Yèyè awu wàngata mpèkaatù webè, mukwambwileyè ne mukufucileyè cibawu. Nzambi ùdi ne mwoyi mule, ùtwàmbwila majitu.

566 Ne pashiishe Yèyè ùdi Nzambi mwîmpè. Wêwè muswè bwà ne, bintu kampànda biikalè mu mùshindù wèbè wêwè, udi mumanyè's, Nzambi mmwîmpè bikumbàne bwà kucyènza. Yèyè ùtu munangè ku—kukusànkisha. Ki citùye muswè. . . Yèyè—Yèyè ùdi dinanga, ne dinanga Dyèndè dinène adi didi diMwenzeja mene bwà kutùùluka panshi mûngà musangu, bwà kukufikisha ku dipeta bintu byùdi muswè abi.

567 Tàngilàayi Toomààsè, paanyimà pàà dibiiikà dyà ku lufù. Toomààsè kàvwa muswè kwitabuuja to. Kaa, yèyè's ùdi ne bânà bààbûngì leelù ewu. Kàdi Toomààsè wàkamba ne: "To. To. Nebikengelè ànu bwà mpetèkù cileeeji kampànda. Nebikengelè ànu bwà ngèlè byanza mu luseke Lwèndè amu, ne mu Yèndè. . . minu yànyì mu byanza Byèndè emu, kumpàlà kwà mèmè kuCìitabuuja. Mèmè, mèmè ncyèna ncyùka binùdi nwènù nwamba abi to." Nwamònu's, ùvwa menemene ànu pambèlù pàà bulongàmè bwà Mifundu, díbà adi mene. Bùdi naabù mbwà kuCìitabuuja. Pa nàнку kwambayè ne: "Bikèngela ngiikalèku ne cileeeji cyà mùshindù kampànda, bwà kuCìijaadika."

568 Ki Yesù ewu pwàà, Yèyè's mmwîmpè: "Lwàku, Toomààsè, piikalàbi ne ki cyùdi ukèba, èè, ncyôci eci. Udi mwà kucipeta."

569 S'ki mutùdi twètù. Tudi twamba ne: "Mukalenge, bikèngela ngààkulè mu myakulu. Bikèngela ngè—ngèlè mbilà. Bikèngela bwà mèmè. . ."

570 "Kaa, akùlaaku, Nènkulekèlè ùcipetè." Yèyè mmwîmpè.

571 Ki kwelayè byanza mu luseke Lwèndè amu, díbà adi kwambayè ne: "Kaa, m'Mukalenge wanyì ne Nzambi wanyì."

572 Yèyè kwamba ne: “Mpindyewu, Toomààsè, witàbùùjì bwà pawàmònu’s. Kàdi difutu kaayi ditàmbe bunène bwà ewu udi kàyi ne cileeeji kàdi mwikàle ùCìitabuuja!” Ki bwalu mbwabù’s. Ki kutùdi ne cyà kafika nkwòkù aku. “Difutu kaayi ditàmbe bunène bwà ewu udi kàyi mumòne cintu nànsha cimwè kàdi mwikàle ùCìitabuuja.” Ncyenzenedi cyà diitabuuja cyà ne, tudi tuCìitaba.

573 Mpindyewu, mèmè ntu ngiitabuuja ne bimanyinu bìdi bifila beena kwitabuuja, kàdi tuteekàayi bintu byà kumpàla pa kaaba kàà kumpàla. Udi mwà kwikala ne bimanyinu, kùyi ne Èci to. Ki mùdi Pòlò mwambè. Mmwambè ne: “Ndi mufwànyine kwakula mu myakulu ànu mùdi bantu ne Banjèlo; ndi cintu cyanàànà. Ndi mwà kutùntumuna mikùnà ku diitabuuja dyànyì; ndi cintu cyanàànà. Ndi mufwànyine kuumvwa Bible, mu mùshindù wà ne ndi mufwànyine kumanya maalú masokoka ònsò a Nzambi; ndi cintu cyanàànà.” Nwamònu’s, awu’s mmapà a Nyumà Mwímpè, kùyi ne Nyumà Mwímpè to.

574 Nyumà Mwímpè n’Nzambi. Nzambi ùdi dinanga, disànka, ditalala, mwoyi mule, musàngèelu, lutùlùlù. Aci ki Nyumà wa Nzambi. Ki cìdi Nzambi ùbìisha ku lufù mu matùkù a ndekeelu ncyòci aci, ku Nyuma awu.

575 Mpindyewu: “Kàyi muswè . . .”

. . . Nzambi, muswè bwà kutàmba kuleeja kùdi bapyànyì bàà mulayi awu . . .

. . . Nzambi, muswè . . . bwà kutàmba kuleeja . . . bapyànyì . . .

Bapyànyì mbanganyì? “Twètù, biikàle bafwè mu Kilistò, tudi tuvwàla Dimiinu dyà Abraham, ne tudi bapyànyì.” Kaa, aci cìdi cibwela anyì? Tudi bapyànyì bàà Bukalenge bwà Nzambi, ku mulayi wà mucipù. Kabivwa bikèngela bwà Nzambi kudìcipa Yè to. Dìyi Dyèndè ndipwàngàne. Kàdi Yèyè wàkadìcipila, kàbìdi, ku Yèyè mwinè, bwalu kakùvwa kampànda mutàmbe bunène to.

576 Patùdi tutùngunuka ne kubala apa, ànu bwà katancì kakesè, tèlèjàayi.

. . . mulayi wà dibènga-kukùdimunyiibwa dyà dipàngadika dyèndè awu, wàkadìshìndikìla ku mucipù;

577 “Dibènga-kukùdimunyiibwa,” cìdi kaciyì mwà kushintuluka. Nzambi kèna mwà kushintuluka to. Bikèngela Àshaale umwèumwè awu. Ne pùikalàbi ne Nzambi wàkondopa mubèèdi kampànda umwe, Yèyè kèna mwà kushintululakù lwìdi Lwèndè nànsha. Nzambi mufwile ngènzàmpèkàatù umwèpelè, ndumbà kampànda umwèpelè luse, Yèyè kèna mwà kushintululakù lwìdi Lwèndè nànsha. Dibènga-kukùdimunyiibwa adi, dibènga-kushintuluka dyà Dìyi dyà Nzambi. Nzambi mmwambè, mu mwaba kampànda ne: “Ndi Mukalenge udi wondopa màsaamà èbè ònsò.” Bikèngela Àshaale

naaCì, bwalu Kàtu ne mikàlù to. Yèyè ùvwa mumanyè ndekeelu kacya ku cibangidilu.

578 Mpindyewu, mèmè ndi mwà kwamba ne: “Nèngènzè *cikampànda*.” Kàdi Bible mmwambè ne, bìvwa bikèngela twìkalè twamba ne: “Bu Mukalenge mwà kwanyisha.” Mbwalu, mèmè ndi wa cifwàkà. Ncyèna mumanyè to. Míngà misangu bikèngela ngùumushè díyì dyànyì adi, kàdi Nzambi kèna mwà kuumusha Dyèndè to. Yèyè ùdi Nzambi.

579 Kàdi Yèyè wàkalòmba cintu ànu cìmwèpelè: “Bu wèwè mwà kwitabuuja.” Kaa, ekèlekèle! “Bu wèwè mwà kwitabuuja, maalu ónsò àdi mwà kwenzeka.” “Bu wèwè mwà kwitabuuja,” kwàjiki. “Wèwè, bu wèwè mwà,” ki lukonko ndwòlò alu. Kàdi kí ndukonko pa Díyì dyà Nzambi to, bwalu, dibènga-kukùdimunyiibwa Dyèndè, Yèyè kèna mwà kushintuluka to. Bilenga kaayì!

580 Mpindyewu tèèlejàayi, patùdi tupweka twenda tubala apa.

Mu mùshindu wà ne ku bintu bìbìdì bìdì kabiyikù mwà kukùdimunyiibwa, mùdìbì kabiyì mwà kwenzekakù bwà Nzambi àshimè to, . . .

Kabiyì mwà kwenzekakù to! Dibènga-kwenzeka ne dibènga-kukùdimunyiibwa bìdì misangu kanà yònsò mwakù ànu wùmwè awu; kàyi mwà kushintuluka, kàyi mwà kunyunga. Cìdi ne cyà kushààla cìmwècìmwè aci kashidi. Kacyèna mwà kushintuludiibwa to, Dibènga-kukùdimunyiibwa ne dibènga-kwenzeka.

Nènku bìbìdì, ku bintu bìbìdì bìdì kabiyikù mwà kukùdimunyiibwa, mùvwàbì kabiyì mwà kwenzekakù bwà Nzambi àshimè, . . .

“Tudi ne bintu bìbìdì?” Èyowà’s. Cyà kumpàla, Díyì Dyèndè dyàkamba ne Yèyè ùvwa ùcyènza. Cìbìdì cìvwa mmucìpù Wèndè wà didicìpa pa bwalu abu ne, Yèyè ùvwa ùcyènza. Kaa, ekèlekèle!

581 Bìvwa bikèngela bwà twìkalè bantu bàà mùshindù kaayì? Tudi ne cyà kwìkala tutànkakajiibwa ne tunyeemakanangana eku ne eku, twangata bintu byà pa buloba ne twenza maalu mùdì bwena Kilistò bupepeja bwà cyena-leelù bwà mu cidimu eci cyà 1957 ebu bwà cinyì? Twètù tudi baswè kwìkala bàà mùshindù wà cyena-kale bàdì bàkwàcìlà Nzambi pa Díyì Dyèndè, ne bàbìikila bintu bìvwà kabiyikù, bu ne bìvwakù. “Pìikalàbì ne Nzambi ngudi mwambè nàнку, Aci ncikòse bwalu.”

582 Abraham, uvwa mupèèshìibwe mulayi awu, kùdiye ne kùdì Dimiinu dyèndè, wàkabiikila bintu bìvwà kabiyikù, bu ne bìvwakù. Bwalu, Cìvwa mmulayi wà Nzambi, mumanyè ne Nzambi kàvwa mwà kushima to. Yèyè wàkamulaya cyòci aci, ne yèyè wàkaCìitabuuja. Kàdi pàvwà bidimu byènda bìpita, ne mulayi kumwèkawù bu ne wùvwa wùtamba kwenda wùseemena

kule, bwà ku mèsù a mubidi, Cìvwa cìtàmba kwenda kuseemena pabwìpì bwà Abraham.

⁵⁸³ Pamutù pàà kulwayè mutekète, ne kwamba ne: “Èè, pàmwápa cintu pààci ne ndyondopa dyà kùdì Nzambi kacitukù to. Pàmwápa ndi ànu mu- . . . Pàmwápa cintu bu nàнку kacitukù to. Pàmwápa ndi mutùpàkàne mu mmwènenu yànyì yònsò ayi.” Dìbà adi, aci cìdi cìleeja cintu cimwèpelè ne, kwèna mulediibwe cyàkàbìdì to. “Bwalu bidi. . .”

⁵⁸⁴ Tudi bajikije aci dyàlumingu dyàshàadi edi, batàmbe ànu kuya kumpàla ndambù mu nshapità amu. “Bwalu kabyèna mwà kwenzekakù to bwà muntu ukààvwakù mulabùle mapà ne bintu byà ku Dyulo, bwà kudishindayè, kàdi kudyàlujululayè cyàkàbìdì ku kanyinganyinga.” Kakùyì mpatà to, kaciyikù mwà kwenzeka to nànsha kakesè!

*Bwalu ewu udi mulediibwe kùdì Nzambi kèna wènta
ne kèna mwà kwenza mpèkaatù to, bwalu dimiinu dyà
Nzambi didi dishàala munda mwèndè, ne yèyè kèna
mwà kwenza mpèkaatù to, . . .*

Dimiinu dyà Nzambi n’Dìyì dyà Nzambi. “Diitabuuja didi difùma ku ditèeleja, ku ditèeleja dyà Dìyì: ‘Mulàmbù wàkafidiibwa. Byònsò mbijikè.’”

⁵⁸⁵ Mpindyewu, wèwè wenza bubì, Nzambi neàkuyoobèshè bwà cyòci aci. Kàdi wèwè wenza, udi mupùile, kwèna ucyènza ku bukòlè to. Nshapità wa 10, mvensà wa 47, ngeela meeji: “Bwalu twètu twenza mpèkaatù ku bukòlè paanyimà pàà bamanè kupeta dimanya dyà Bulelèlà.” Kàdi paanyimà pàà wèwè mumanè Kulediibwa, udi ne Bulelèlà; kaciyi dimanya dyàBù to, kàdi witàbì Bulelèlà ne Bwàshàadi cintu cyà bushùwà. Ne udi mwànà wa Nzambi, bwà cikondo ne bwà Cyendèlèlè. Nzambi mmudìcipe ne Yèyè ùvwa ne cyà kucyènza.

⁵⁸⁶ Yesù wàkamba ne: “Ewu udi utèeleja Méyì Àànyì, ne wìtabuuja Yèyè udi muNtùme, ùdi ne Mwoyi wà kashidi, ne Mèmè nèmubishè ku lufù ku ditùkù dyà ndekeelu. Yèyè kàakupita ku cilumbulwidi nànsha. Wàmányì kuumuka ku lufù ne wàyi ku Mwoyi.” Mpindyewu ne mucipù wà mùshindù awu ne: “Nzambi muswè bwà twètù kuWùpeta.”

⁵⁸⁷ Mpindyewu tàngilàayaaku cìdiye wàmba kaaba aka, m’Pòlò udi wambila è—èkèleeziyà ewu.

*. . .bìdì kabiyi mwà kwenzekakù to bwà Nzambi
àshimè, bìvwa bikèngelà bwà twètù kupeta
dikànkamika dikòlè, . . .*

Kabiyi byà ne: “Èè, ba-Baptistes bôbò kabàyi bambèèje bîmpè, nènnyè mu ba-Méthodistes” to. Nwamònu anyì?

*. . .bikèngela bwà twètù kupeta dikànkamika dikòlè,
twètù bàdi banyemène ku cinyeemenu bwà kukwàta
ditèkemena didi ditèekùibwe kumpàla kwètù aba.*

588 Mpindyewu mu kubala kwà citùpà cyà ndekeelu.

Dyòdì ditèkemena ditùdì naadi bu lwongò lwà musùùkà edi, . . .

Dyòdì ditèkemena adi, mucipù wà ku didicipà dyà Nzambi, ditùdì naadi bu lwongò lwà musùùkà, ditwìshùbwe ne dishimate, ne didì dibwelà mu cidi munda mwà cibwikilu,

589 Twánjàayi kwakulakù ànu katanci kakesè pa “cibwikilu.” Katùvwa baakùlepù bìmpè menemene mu dilòlò dyà dyàlumingu dishààle to.

590 “Mu cibwikilu.” Cibwikilu mmubidi. Cibwikilu ncìdì citùpangishà bwà kumòna Nzambi, mpàla ne mpàla, mu èkèleeziyà ewu emu. Cibwikilu ncìdì citùpangishà bwà kumòna Banjèlo mu myaba yàbò mu dindà emu, biimàne ku luseke lwà nkwasà ayi. Cibwikilu ncìdì citùpangishà bwà twètù kuMumòna. Twètù tudi basokoka paanyimà pàà cibwikilu, ne ciinè cibwikilu aci mmubidi. Tudi bàna bàà balùme ne bàà bakàji bàà Nzambi, tudi mu Bwikadi bwà Nzambi: “Banjèlo bàà Nzambi mbaasè citùùdilu cinyùngùlùkile aba bàdì bàMuciina.” Tudi mu Bwikadi bwà Nzambi, dībà dyònsò. “Ncyàdyàkukulekela, anyì Ncyàdyàkukushiyakù nànsha. Nèngìkalè neebè misangu yònsò, too ne ku ndekeelu.” Kàdi cibwikilu aci mmubidi, ki cidi citùpangishà Bwikadi Bwèndè. Kàdi kupicila ku musùùkà, Nyumà, ku diitabuuja dyètù tudi bamanyè ne Yèyè ùdì ùtùtàngila. Mmwimàne ku luseke lwètù. Ùdi kaaba aka mpindyewu.

591 Ku Dotàna kwàka, dindà kampànda, mupròfetà mununu kampànda ùvwa munyùngulukila kùdì cilwilu kampànda ne musadidi wèndè kupàtukayè ne kwambayè ne: “Èyì taatù, citùpà cijimà cyà buloba eci’s ncinyùngulukila kùdì beenyi.”

592 Kàdi Eliyà kujuukayè, e kwamba ne: “Mòna’s, mwanàànyì wa balùme, bàdì neetù twètù mbapite bàdì naabò bóbò ku búngì.”

593 Èè, kutuutayè mipòdì kukènzakanayè. Kàvwa mwà kumòna cintu nànsha cimwè to.

594 Yèyè ne: “Nzambi, ndi muswè bwà Ùmutàbèèjèku mèsù, ùmushè cibwikilu aci.” Nènku pààkapònà cibwikilu cìvwa ku mèsù kwèndè aci, mu nyùngulukilu wa mupròfetà mununu awu mùvwa màkalù a mvità a kapyà, mikùnà yìvwa mikwàte Kapyà ne Banjèlo ne màkalù a mvità. S’ki bwalu mbwabù.

595 Kaa, dībà adi Gehàzi ùvwakù mwà kwamba ne: “Ngù—ngùmùvù mpindyewu.” Nwamònu’s, cibwikilu cìvwa cipòne. Ki mwaba wùdì cipùmbishi ngwòwò awu.

596 S’ki cyòci eci. Ikàlaayi bacìkwàte bikolè. Cibwikilu ncìdì citùpangishà bwà kwikala ne nsòmbelu uvwa ukèngediibwa bwà twètù kwikala nèndè. Cibwikilu ncìdì citùpangishà bwà kwenza

bintu bitùdi bulelèlà baswè kwenza. Nènku Nzambi wàkalwa mubwikila mu mubidi, ne cibwikilu cyàkapandiibwa bipese bibidi. Ki Nzambi kulwaYè Nzambi cyàkàbìdì, ne Wàkajuula cibwikilu mùvwàYe muDisokòke. Ki dibìikà dyà ku lufù dyà Mukalenge Yesù ndyòdi adi. Mwikàle ùtùjaadikila ne, mu eci cibwikilu mutùdi basokòmène emu, ku diitabuuja nkutùdi tuCìitabuuja ne tuCìitaba. Kàdi pààpandiibwà eci cibwikilu mu bipese bibìdì, nénye mu Bwikadi Bwèndè ne ditwishiiibwa edi, mumanyè ne: “Ndi muMumanyè mu bukòlè bwà dibìikà Dyèndè dyà ku lufù.” Ku Dilwa dyà Mukalenge Yesù, cibwikilu eci necibiishiibwè ku lufù, mu mùshindù mupwàngaja, mu mùshindù wà ne nèngèndè ne nèngàakulè Nèndè bu Musùngidi wanyì ne Nzambi wanyì, pàngatàYe nkwasà wa butùmbi wa Davidi. Nènku netwikalè ne mwoyi kashidi mu cibwikilu eci paanyimà pàà cimanè kupwàngajiibwa, kàdi eci cibwikilu cidi ne mpèkaatù mu cyòci. Nànsha cyòci. . . Kanwèdikù meeji ku mubidi mutùmbishiibwe awu pa buloba ebu to. Bidi bikèngela bwà kufwàwu, mùdibi bikèngela bwà musùukà wèbè kufwàwu amu, bwà kulediibwawù cyàkàbìdì.

⁵⁹⁷ Mu bupwàngàne, bwa wùbenga kudyà minyìinyi, ne wènza *cikampànda*, ne kupwàngaja mubidi, wèwè kwàkubupetakù to. Nènku bikèngela ùlekelè *cikampànda*, ne wènzè *cikansanga*, ne wènzè *cikankènga*, ne wènzè *cikampànda*, aci mmikenji. Abu mbeena ne ànu mikenji. Twètù katwèna twitabuuja bintu byà kwisùkwisù byà lupàndù byà beena ne ànu mikenji abi to. Tudi twètù tuCìitabuuja ne ku ngàsà nkutùdi basùngidiibwe. Ne kí ngwèwè to. Wèwè kwèna ne cyà dyenzamù nànsha címwè to. Disungula dyà Nzambi ndidi dicyènza. “Muntu nànsha umwe kèna mwà kulwa kùNdi pàdi Taatù Wanyì kàyì mumukòke to.” Ncyà bushùwà. Nènku Yèyè. . . Cyònsò cyàkalwà Yesù kwenza cìvwa nkwangata aba bàkaavwà Taatù mudyànjlile kumanya; ne mudyànjlile kubàlongolola kumpàlà kwà difùkà dyà dyulu ne buloba bwà kulwabò bânà bàà balùme ne bàà bakàji bàà Nzambi. Amen. “Kí ng’ewu udi unyeema, anyì ewu udi muswè to, kàdi n’Nzambi udi uleeja luse.” Nzambi ngudi ucyènza. Kwèna mwà kuditwakù makùmbù to, nànsha kakesè. Kakwèna cintu cyùdi wèwè mwenzè to nànsha címwè. Nzambi, ku ngàsà, ngudi mukusùngile; kí ngwèwè, wèwè mwinè to. Byòbi ne ngwèwè, udi ne cintu kampànda cyà kuditwila makùmbù. Kàdi kwèna ne cyà kuditwila makùmbù to. Butùmbi bwònsò bùyàaya kùdiYe. N’Yèyè. Dìbà adi Yèyè wàkupèèshi ditèkemena ditwishiiibwe ne: “Mudicìpile ku mucipù, dibènga-kwenzeka dyà ne bânà Bèndè bàdikù mwà kujìmina.”

⁵⁹⁸ Kadi, bàdi bàdya mfimbù bwà dyenza dyà bubi. Wèwè udi upòdla cyùdi ukùna. Ki cyùdi upeta. Kwìkadikù wadyàmbidila mpindyewu ne udi ànu upàtuka ukenza mpèkaatù, kàdi kushààla kùyì unyookiibwa to. Wèwè mwenzè, ne mwikàle ne lwidi alu, cidi cileeja ne kacya kùtukù mwanji kulediibwa

cyàkàbìdì to. Nwacyũmvù anyì? Wèwè mucìkàlè ànu ne dijinga adi munda mwèbè, dyà kwenza bibì, dìbà adi ucìdì ànu mupìilè. Nwamònu anyì? “Bwalu Yèyè mmupwàngàje, kashidi, aba bàdì. . . Ne nyama ya mu Dipungila Dikùlukulu ayi, mu matùkù a mikenji awu, yìvwàbò bàlàmbula ku cidimu ku cidimu ayi, byà kashèndèndè, kayìvwakù mwà kuumusha mpèkaatù to.” Kàdi twètù patùdì tutenteka byanza byètù pa mutù Wèndè, ne tutonda mpèkaatù yètù ne tulediibwa cyàkàbìdì ku Nyumà wa Nzambi, katwèna kàbìdì ne dijinga dyà mpèkaatù to. Mpèkaatù wàmanyi kuumusha. Aci mbwà cikondo ne Cyendèlèlèlè.

599 Newènzè bilèma. Neùdishìndè. Newènzè bibì ku bukòlè. Míngà misangu neùpatukè ùkenzè bintu kampànda. Aci kacýèna cyùmvwija ne udi mujìmine nànsha. Aci cìdì cyùmvwija ne neùpetè dilongolodiibwa ku bubì.

600 Mwanàanyi mukèsè wa balùme, misangu yàbùngì, bàna bàanyi mèmè, s’nebènzè bintu kampànda. Bèèbè wèwè abu, s’bàtu bènza pààbò. Bwà ne wèwè. . . Mbamanyè ne aci cìdì cìbèngangana ne tunungu twèbè—twèbè. Ne mbamanyè cyàbènzekèlè pàdìbò bàcyènza apu. Nebàpetè mfimbù bwà bwalu abu, pàmwàpa yèbè yà menemene eyi. Kàdi yèyè’s ùdì ànu mwanèbè. Cyà bushùwà’s.

601 Kabyèna mwà kwenzekakù to bwà muntu awu kujìminayè cyàkàbìdì, wa mulediibwe ku Mwoyi wà Cyendèlèlèlè awu. Nzambi kî mmwena kupà-kupala to. “Ewu udi utèlèje Mèyì Àanyi, ne wìtabuuja Yèyè udi muNtùme, ùdì ne Mwoyi wà kashidi; ne yèyè kàakupicilakù ku cilumbulwidi nànsha, kàdi mmuumùke ku lufù muyè ku Mwoyi. Mèmè nèmubìishè ku lufù ku matùkù a ndekeelu.” Ki mulayi wà Nzambi ngòwù awu.

602 Mpindyewu wèwè mutùngùnùke, wamba ne: “Kaa, èè, nàнку mèmè’s ndì ànu mwà kwenza. . .” Mèmè ntu misangu yònsò ngenza ànu cìdì muswè kwenza aci. Kàdi wèwè mwìkàlè mwena Kilistò, kwèna uswà kwenza cintu cìdì cibì to, bwalu Mwoyi mene wùdì munda mwèbè amu, cishimikidi ciinè. Wèwè uswà kwenza bibì, cìdì cìlèeja ne cintu cibì aci cìdì munda *emu*. “Mmunyì mùdiku màyì a bululu ne matalàlè mwà kufùmina mu mpokolo umwe?”

603 Pa nàнку udi mupetè cibwejàkàji pa disaluka dyà mùshindù kampànda, anyì disaluka dyà *cintu kampànda* cyà mu myanu: Ucipwè mwoyi! Alùkilà ku cyoshelu wàmbe ne: “Nzambi, nguumùshèku nsòmbelu wanyi mubìipe wa kale ewu, ne ntèkèku mu ngiikàdilù kampànda mùdì dijinga dyànyì dyònsò. . .”

“Ewu udi mulediibwe kùdì Nzambi kàtu wènza mpèkaatu to.” Ncýà bushùwà. Kèna ne dijinga dyà kwenza nàнку to.

604 Bulelèlè, dyabùlù neàmwelèlè matèyì *apa* ne *pààpa*, kàdi kabìyì byà ku bukòlè to. Ki cìdì Bible mwambè. Dyabùlù neàmwelè matèyì, ku musangu ne ku musangu. Bushùwà,

ki cyènzàye. Yèyè's wàkateeta kwela Mukalenge wetù Yesù matèyi. Wàkeela Mòsà, ne kumukwatayè. Wàkeela Peetèlò, ne kumukwatayè. Wàkeela bààbúngì, kàdi . . . Peetèlò wàkaMuvila mene, kàdi pashiishe wàkaya e kudila bujindajinda. Kùvwa Cintu kampànda munda mwèndè.

⁶⁰⁵ Pààkalekelediibwà nyuunyi wa nkuci pambèlù pàà bwàtù . . . Cikòlòlò cyàkapàtuka, cyàkaya cyènda cidila eku ne eku. Cìvwa mu bwàtù amu ànu bìmpè, kàdi pààkapàtùkàci, ngiikàdìlù waci ùvwa mushiilàngàne. Cìvwa mwà kudyà bitàlù byònsò byà kale bìvwàci ciswè kudyà abi, ne kwikala cisànkishiibwe. Bwà cinyi? Cìvwa ncikòlòlò, ànu kwònsò aku. Cìvwa cidý'á-bibolè. Kacivwakù cìmpè to. Cìvwa cyena lubombo cìvwà cisòmbè pa mucì wà kwikila pàmwè ne nyuunyi wa nkuci awu, cinène ànu mùvwà nkuci amu. Cìvwa mwà kubùuka myaba yònsò yìvwà nkuci mwà kubùuka ayi. Kàdi cìvwa mwà kudyà cyàkudyà cìmpè ànu mùvwà nkuci ùdya amu. Kàdi pashiishe cìvwa mwà kudyà byàkudyà bibolè, bìvwà nkuci kàyikù mwà kudyà abi. Bwalu, nkuci ùdi cintu cishiilàngàne. Yèyè mmwenza bishiilàngàne. Yèyè nnkuci. Ne nkuci kèna mwà kwenzeja bwà byàkudyà bibolè kwandamukabi bifidi byà mashi to, bwalu yèyè kàtu ne kanyònga to.

⁶⁰⁶ Ne muntu udi mulediibwe kùdi Nyumà wa Nzambi ùdi ùlwa nkuci wa Nzambi, ku ngiikàdìlù wèndè, ku nshintùlùkìlù wèndè, ku mùshindù wùdiye mwenjiibwe. Èyowà's, mukalenge. Wèwè mwelè nyumà wa—wa nkuci munda mwà cikòlòlò, kí ncifwànyìnekù kwikila pa citàlù cifwè to. Cyòci citùpàkàne ciikilepù, ncyà bushùwà ne ncifwànyìne kuumukapù ne lùkàsà lwònsò. Kí ncifwànyìne kupàtwàla to. Ne muntu udi mulediibwe kùdi Nyumà wa Nzambi, kèna ùbitwàla nànsha. Mmufwànyìne musangu kampànda katùlùlukila ku mpùùkàpùukà mu nzùbu wa cinwinù cyà maalà, kàdi neàpatukèmu ne lùkàsà lwònsò. Mukàji kampànda mmufwànyìne kumuseeswisha, kumufikisha ku dikùdimuka, kàdi yèyè neàpingajè mpàla wèndè kukwàbò. Neùmukè mwaba awu ne lùkàsà lwònsò. Bwà cinyi? Yèyè nnkuci. Ncyà bushùwà. Wèwè kwakumukùtakajakù to, bwalu mmumanyè. “Mikòòkò Yànyì mmimanyè Dìyì Dyànyì, ne kayàakulonda mwenyi nànsha.” Yèyè nnkuci, ànu kwònsò aku. Ki cyòci aci cindi ngamba, cintu kampànda cilelèlà cidi cyele lwongò munda amu.

⁶⁰⁷ Tàngilàayi ne ntèmà yònsò mpindyewu. “Nzambi wàkadicipa.” Kaa, cidi . . .

Dyòdi ditèkemena ditùdi naadi bu lwongò lwà musùukà, ne . . . dishimàte, ne didi dibwelà mu—mu cidi cibwikilu,

⁶⁰⁸ “Cibwikilu.” Nzambi wàkalwa pànwapa, mubwikila mu mubidi. Bwà kwenza cinyi? Bwà kuDileejà. Bìvwa bikèngela Àsokomè, bwalu katùvwa mwà kuMumòna to. Ki kusokomaYè

paanyimà pàà cibwikilu aci. Ne cibwikilu aci cìvwa Nganyi? Yesù. “Kì m’Mémè udi wenza byenzedi to, n’Taatù Wanyi,” mwàkambà Yesù. “Taatù Wanyi mmusòmbèle munda Mwànyì. Mémè ndi nkwàta mudimu. Taatù ùdi ùkwàta mudimu, ne Mémè ncidi nkwàta mudimu too ne mpindyewu.” S’ki Yèyè ewu bu mubwikila Awu, wènda wènda mu mubidi, Nzambi, Èmanùwèlè, Nzambi neetù. “Nzambi ùvwa munda mwà Kilistò, ùpungisha bàà pa buloba ne Yèyè mwinè.” S’ki Yèyè ewu, wènda wèndakana.

609 Mpindyewu, Wàkalwa pànwapa ne kwenza dijidilangana, anyi dilongolola dyà mùshindù, anyi difuta dyà cibawu, bwà ku lufù Lwèndè mulàmbulè, mufutè musinga wà mpèkaatù, bwà Yèyè wàmòna mwà kwalukila ne kusòmbela munda mwètù. Dìbà adì diitabuujà ditùdì naadì dìdì—dìdì ndiitabuujà dibwikila, anyi muntu mubwikila. Kì bwà cinyi katwèna tutàngila ku bintu bitùdì tumòna mu eci cibwikilu to. Cibwikilu cìdì ne malonga a tùlaasà, ne cidi cyènta bintu ne cyàmba bintu. Ncintu cyà maalu a mamanya. Kàdi Nyumà wa Nzambi udi ne mwoyi udi musòmbèle munda emu awu, ùdi ùbìikila bintu bìvwà kabìyikù abi, bu ne bìvwakù, pìikalàbi ne Nzambi ngudi mwambè nànkù. Kì dibwikidiibwa dyènù ndyòdì adì. Tudi mu cyòci cibwikilu aci.

610 Mpindyewu, dínghà ditùkù Yèyè neàbiishè cibwikilu eci ku lufù, kacyi cilela kùdì mukàjì ku djinga dyà bulùmè ne bukàjì dyà mulùme ne mukàjì to, kàdi ku diswa dyà Nzambi Yèyè neàkulè ne necyènzekè. Dìbà adì netwikalè ne mubidi mufwànàngàne ne mubidi Wèndè Sungasunga wà butùmbi awu. Netwikalè babwikila, bwà twamòna mwà kuyiikilangana muntu ne mukwèndè, kulabulangana ku cyanza muntu ne mukwèndè.

611 Mpindyewu, patùdì tuumuka pànwapa, kùdì ntentà, tèòfàní kampànda, mwikàle menemene ànu cimfwànyì cyà muntu, udi kàyì udyà, kàyì unwà, kàyì ulààla, mutàbàle bwà kashidi. Kì kutùyaayà nkwòkù aku. Kàdi mbindile mwinshì mwà Cyoshelu, bèèla lubilà ne: “Mukalenge, ntoo ne ku dìbà kaayi’s? Ntoo ne ku dìbà kaayi’s?” bwà kwalukila pa buloba. Bwalu, mbaswè bwà kulabulanganakù ku cyanza muntu ne mukwèndè. Mbaswè kusòmbela panshi kudyà, kuyiikilangana muntu ne mukwèndè. Bòbò’s mbantu. Dìnà dyà Mukalenge dibeneshiibwè!

612 Pààkenzà Nzambi muntu mu cimfwànyì Cyèndè Sungasunga ku cibangidilu, ki mwàkamwenzàYe nànkù. Ùvwa nendè mu bwobùmwè, bwalu tudi bamanyàngàne muntu ne mukwèndè. Tudi banangè bintu bidì Nzambi mutwènzèle, bwalu tuvwa benza mùshindù awu. Ku Dilwa Dyèndè dyà butùmbi, aba bàdì badìlongòlòle nebìikalè nànkù bwà kashidi. Katùyi tufwà to, netwimanè mu difwànangana Nendè. Kaa, Dìnà dyà Kilistò adì dibeneshiibwè!

613 Kàdi mpindyewu tudi ne cyeyà cyà lupàndù lwètù, patùdì tuMwitaba bu Musùngidi wetù sungasunga, bu Mwondopi wetù. Byònsò ebi mmafutu, anyì, mmakàsà àdì àfuciibwà pa kabèjì kàà assurance. Amen. S'nudi bamanyè kabèjì kàà assurance ne ncinyì. Udi mwà kupetelapù mfrangà yà makàsà too ne pàdì mushinga mwena diìnà wùlwa. Cyà bushùwà's. Udi mwà kupetelapù mfrangà yà makàsà. Nènku ki twètù kupetelapù mfrangà yà makàsà eku's patùdì twakulangana apa. Cintu cùm-wèpèlè, cidi ànu ne, patùdì ànu tusuna mfrangà yà makàsà, difutu dyàlu kuungwila cyàkàbìdì mushiki.

614 Mwena mudimu wa assurance, musangu kampànda, wàkangambila ne: "Billy, ndi muswè nkusùmbishèku assurance."

Mèmè ne: "S'nkààdi nendè." Mukàjàànyì kukùdimuka e kungooshayè dísù.

615 Mpindyewu, ncyèna cilumbù ne assurance to. Kàdi bàmwè bantu bàtu "bapèlè bwà assurance." Pa nàнку, ki kukùdimukabò. Yèyè awu kwambayè. . .

616 Mukàjàànyì kungooshayè dísù, dyà bwalu bukolè ne: "Wèwè ewu ne assurance?"

617 Mèmè ne: "Èyowà's." Mukàjì neebè kàyi ne cìvwàye mumanyè pa bwalu abu to.

618 Muntu awu ne: "Èè, Billy, assurance ùdì wèwè nendè ngwa mùshindù kaayi awu?"

619 Mèmè ne:

Ditwishiiibwa dibènesha, Yesù ngwanyì mèmè!
Kaa, kàadyosha kaayi kàà butùmbi bwà
Nzambi's wè!
Mupyànyì wa lupàndu, musùmba kùdì
Nzambi,
Mulela ku Nyumà Wendè, musukula mu Mashi
Èndè.

620 Yèyè ne: "Aci's ncìmpè be, Billy," yèyè ne, "kàdi kacýàkukubwejakù mu nkità emu to."

621 Mèmè ne: "Kàdi's neCìmpàtùlèmu. Ki cyà mushinga ncyòci aci." Ncyèna mèmè ntàcisha meeji bwà dibwelamù to; ndi ntàcisha meeji mbwà dimùpàtuka.

622 Nènku bu mùndi ne ditwishiiibwa adi, kùdì Nzambi wa Cyendèlèlèlè wàkadicipa awu, ne Yèyè neàmbiishè ku lufù mu difwàngana ne Mwan'Èndè, ku ditùkù dyà ndekeelu, mèmè nèngèndè ne dikima dyònsò ne nèngiikalè ne busàmbi ne lwongò lwà musùkà, bwà ne, pàncidi mu eci cibwikilu apa kùdì Cintu kampànda cidi kacýi cìmwènèka cidi cingeelèshe lwongò dyàmwàmwa pa Lubwebwe lwà bikondo. Pààtùpikà màyi ne kutuutawù dikùbàkùbà, kabyèna bìshintulula cintu to. Pìikalàbi ne lufù, njiwù mikolè, anyì nì ncinyì, kabiyi bitùtápulula ne

dinanga dyà Nzambì. Lwongò lwànyì ndukwàte munda mwà cibwikilu aci. Nànsha màyi mapaasàlale. Nànsha mapaasàlale ne penyì. Beena dyabùlù nànsha balwè. Mwena kwitabuuja mulediibwe cyàkàbìdì ùdì ne lwongò. Kwèna mwà kwanji kumwèna mu eci cibwikilu to. Kàdi ndi mumanyè ne lwongò lwànyì ndukwàte dyàmwàmwa ku Lubwebwe lwà bikondo, Lùdì mulayì mwenzela mucipù ne Yèyè neàmbiishè ku lufù ku ditùkù dyà ndekeelu.

⁶²³ Kabyèna bikèmesha to mùdì mwà kutàngila lufù mumpàla, kwamba ne: “Kalonda kèèbè kàdi penyì? Lukità, bucimunyi bwèbè bùdì penyì? Kàdi twasàkidila kùdì Nzambì udi utupèeshila bucimunyi ku Mukalenge wetù Yesù Kilistò.”

Mwômò amu mmùdì *mudyànjididi*. . .

Kaa, ekèlekèle! Katwàkufikakù ku dìleesònà to.

Mwaba wùdì mudyànjididi. . . *bwètù twètù*

⁶²⁴ Mudyànjididi's. Nukààdikù bamòne, mu matùkù a kale a beena wesètè (Misangu yàbúngì nkààdikù mukòsòlwèle mu tujila twà kale amu.), mmudyànjididi, anyì nsùkutù awu anyì? Pàvwà tubalù tukòkì twà matempu twàmba kubùtuka, bwà dipanga dyà màyi, nsùkutù ùvwa ùdyànjila lubilu. Ne ùvwa ùmòna bisàmbà byà ba-Indiens; ùvwa ùbicinguluka. Ne ùvwa ùmòna mwaba wùvwà mushimì wà màyi wùsanganyibwa. Ùvwa wàlukila lubilu lukolè bwà kuya kambila mfùmù wa kàwulù kàà cyà mudimu aku ne: “Kolèshaayi lubilu pa tubalù, bantu bònso bàkoleshè mwoyi, bwalu ànu luseke lukwàbò lwà mukùnà lwàlwa kùdì mpokolo munène wa màyi.” Ki mudyànjididi nyèyè awu.

⁶²⁵ Nènku apa, Mudyànjididi. Musangu kampànda muntu ùvwa mubàmbidikila panshi kùdì dyabùlù, mwinshì mwà màzajì a kùmwekùmwe, kàdi Muntu kampànda kwangataYè cingoma cyà mwabùùyì aci. Ùvwa n'Yesù. Mudyànjididi ùkaadi mutùdyànjidile. Nènku Sàtaanà mwimàne kwàka ne cingoma cyà mwabùùyì, kacya wàtùbàmbidikila panshi, pèètù misangu yònsò ànu mu bupika tuciiina lufù. Ùvwa mulamè Mushimì awu. Bushùwà's, ki civwàye mwenzè. Ùvwa mupèeshiibwe mudimu mumutùma naawù, bwalu tuvwa benzè mpèkaatù ne biipàciibweKù. Kàdi Mudyànjididi awu, Kilistò, kulwa kunyènga cingoma cyà mwabùùyì aci.

⁶²⁶ Nukààdikù bumvwè musambu wà kale awu ne: “Ikàlaayi balamè citùùdilu, bwalu Ndwàlwa” awu anyì? Kì nkwikala balamè citùùdilu to, nànsha kakesè; tucikwàtaayi. Katùcyèna baswè kushàala ànu tucilama nànsha. Kilistò ùkaadi mwangàte citùùdilu. Àlèluuyàh! Ciibi ncyunzulula. “Kùdì Mpokolo mukàngula mu nzùbu wa Nzambì, mu nsesa yà Davidi, bwà kukezula, bwà dikezudiibwa dyà bakooyike.” Mutùdyànjididi wetù ùkaadi mumanè kubwela pa kaaba kèètù.

627 Mudyànjididi, Yèyè ùdi ùtwàmbila ne: “Kùdi mwaba kampànda ànu luseke lukwàbò lwàlwa, dyàmwàmwa, kunwikalà kanùyikù mwà kukùlakaja to.” Kwikalà kakùyì minyèngù, kwikalàbi kabìyì bìkèngela kulaaba bilaabu byà Max Factor bwà kukupèèsha mmwènekèlu mulenga kùdi bàyeebè to. Mudyànjididi ùkaadi mudyànjlile. Kamwènakù mwaba wà nukùlakaja ne nucyòkakana ne nuzakalala to. Mwàmwa kí mmwaba wunwikalàku nusaama to. Kamwàkwikalakù mwànà wa mu dibòko munda mùmunyènga to. Kamwàkwikalakù mwà nujìmija cintu cyà mafi, anyì nujìmija dìnù, bwà kupeta dyà mafi to. Àlèluuyàh! Kaa, Dìna Dyèndè dibeneshiibwè's wè! Yèyè ùkaadi mubwelèmu, ne katùyì tufwà to netwimanè mu difwànangana Nendè, dîngà ditùkù dyàmwàmwa. Nebàkenkè kutàmba ne mìtootò ne dîbà. Cyà bushùwà. Mudyànjididi ùkaadi mutùdyànjdilè.

. . . mudyànjididi ùkaadi muyè, ùkaadi mubwelè pa kaaba kèètù, Yesù mene awu, muvwijìibwe mwakwidi munène bwà kashidi mu mulongo wà Melekisedekè.

628 Mudyànjididi munène ewu mmutùdyànjdilè, ùpenga njila. Yèyè mmumùke ku Nyumà, mpokolo minène yà mwanzankòngòlò wà Nzambi, Uvwa kàyi ne ntwàdijilu anyì ne ndekeelu awu. Yèyè ùvwa, ku kale kònsò aku, ànu Nzambi.

Lusèsà lwà Bukènkè elu lwàkapàtuka. Lùvwa ndusèsà lwà dinanga, ki lwà mushinga munène, lukünze. Diikala didi dilonda, divwa ndyà bleu; bleu, lulamatu. Pashiishe, yìvwa milondè paanyimà pàà alu yìvwa nyà meekala makwàbò, too ne ku meekala mapwàngàne mwandamutekète awu, àdi Nyumà mwandamutekète yà Nzambi, yìdi mipàtùkile mu Mpokolo munène anyì Mbongò munène ùvwa Yesù mwambè awu ayi. Mbongò munène awu wàkasongiibwa, bwà kuleeja òwò meekala awu. Nzambi wàkavwijìibwa mubidi ne wàkasòmbela munkaci mwètù, bwà Wàmòna mwà kuleeja bwìmpè Bwèndè ne luse munkaci mwètù, ku mapà ne bimanyinu ne maalu a kukèma. Mwanzankòngòlò munène awu mu kaabujimà wàkalwa Tèòfàní, wa, mwenjìibwe mu cimfwànyì cifwànàngàne ne muntu, kàdi pààbi Yèyè kàvwa muntu to, Kàvwa mwanjì kwikala ne mubidi to, Ùvwa n'Tèòfàní.

629 Mòsà wàkamba ne: “Ndi muswè kuKumòna.” Nzambi kumusokokaYè mu lubwebwe.

630 Nènku pàakapitàYe mwab'awu, Yèyè Wàkeela nyimà. Mòsà kwambayè ne: “Cìvwa cifwànàngàne ne nyimà wa muntu.”

631 Pashiishe cyàkenzekà ncinyì? Dîngà ditùku kuntwaku, pàvwà Abraham musòmbè mu ntentà wendè. Netùkùfikè, dilòlò edi. Pàvwà Abraham musòmbè mu ntentà wendè, Nzambi wàkalwa kùdiye, mu mubidi wà musunya.

“Kaa,” mùdi wèwè wamba, “Mwanèètù Branham, yèyè's ùvwa . . .”

632 NetùMusangàne mwaba ewu mene ùtwilangana ne Abraham kumpàlà kwà cyòci aci, mu mulongo wà Melekisedekè, mubidi wà musunya, uvwa Nzambì awu. Bushùwà's, mmùvwàbi. Ùvwa Nzambì mu mubidi.

633 Wêwè udi wamba ne: “Nènku, Mwanèètù Branham, bwà cinyi byàkakèngela bwà Àlukilè bwà kulediibwa?”

634 Dìbà adi Kàvwa mwanji kulediibwa to. Ùvwa ànu mufùkiibwe cyanààna, mubidi wàkasòmbelàYemù. Melekisedekè ùvwa Mfùmù wa Salèmà, mbwena kwamba ne Mfùmù wa Yelusàlèmà, udi Mfùmù wa ditalala; uvwa kàyi taatù anyi maamù awu, kàyi ne ntwàdijilu wa matùku anyi ne ndekeelu wa mwoyi to.

Yesù ùvwa ne bònso bàbidi taatù ne maamù, ne ntwàdijilu wa matùkù ne ndekeelu wa mwoyi. Kàdi Wàkavwijiibwa “mu mulongo” wà Melekisedekè, uvwa kàyi ne ntwàdijilu wa matùkù anyi ne ndekeelu wa mwoyi awu.

635 Melekisedekè ùvwa Nzambì Yèyè mwinè. Melekisedekè ùvwa Yèhowàh Nzambì, umwèumwè Wàkatwilangana ne Abraham awu, paanyimà pàa bidimu, kumpàlà kwà ntentà wendè. Ùvwa mumwelè nyimà; kwambaYè ne: “Sarah wàsekì bwà cinyi?” Ncyà bushùwà. Ùvwa Ewu uvwa mwimàne mwaba awu, mutàngile lwà ku Sodomà. Abraham wàkaMujingulula, bwalu munda mwà cibwikilu cyèndè mùvwa lwongò lukwàte mulayi awu. Kì mbwalu ùvwa ne disaluka kampànda to, kàdi Nzambì wàkamupèèsha mulayi. Nènku pàkabwelàye mu dipetangana ne cyamù cinènè cyà nzemu cyà cikòka bintu aci, wàkamanya ne Cìvwa mu mubidi awu.

636 KupàtukaYè pàmwè ne Abraham, pambèlu apu kantàntà ndambù. KwambilaYè Abraham. KwambaYè ne: “Pa kumòna cyòci aci, Nènsokokè Abraham maalu aa, pa kumòna ne yèyè mmupyànyi wa buloba anyi? Ncyàkucyènzakù to.” Pa nàнку: “Abraham, Nènkwanbilè cìNdi mukwàcile njila bwà kuya kenza,” netwàlukilèpu dilòlò edi, “mu Sodomà mwàmwa,” ne cìvwàbo bònso bàya kenza. Nènku Yèyè mmwenzè ànu ùbènesha Abraham, Pèndè kumbà kwalukila cyàkàbidi mu cibwàshibwàshi. Muntu uvwa mwimàne mwab'awu mwikàle ne lupwishì ku bilàmbà awu, Muntu. Kàbidi kaciyi ànu aci to, kàdi Wàkadyà munyìinyi wà kànà kàà ngombe kàvwà Abraham mushebèye, ne munkaci mwà kunwà mabèèlè a ngombe, ne kudyà tûtò twoshila pa lukàsu (màmpa a bukula bwà nsèke), twikàle tulaaba màntekà. Ncyà bushùwà menemene. Ne pashiishe kwalukila cyàkàbidi ku Tèòfànì.

637 Cìvwa ncinyi? Bwà cinyi Kààkawàngata piinè apu? Yèyè kàvwakù mulediibwe bu wêwè ne mèmè to. Kàdi byàkakèngela bwà kulediibwaYè mu mubidi, bwà Wàmòna mwà kulama kalonda aku. Awu wùvwa mmubidi mufùka. Wùvwa mmubidi wùvwàYe mwenzè ànu pa kukòka kàlisiyumù ne binshidimba

mu buloba, wàmba ne: “Hyu,” ne kubwelamù. Cìvwa ncintu cìmwècìmwè aci cìvwa Melekisedekè. Wàkabwela mu yèyè, mu mubidi wùvwàYe mwà kupàtuka naawù kumpalà kwèndè mwinshì mwà cibwikilu, mwà cibwikilu cyà bufùkì Bwèndè Sungasunga; kaciyi cibwikilu cyà bufùkì bwà mukàjì to, kupicila ku difù dyà mukàjì, ku ka—kabùlù kàà mashi to, nànsha kakesè. Kàdi ewu Yèyè wàkawùfuka ne wàkabwelamù, ne kuyiikila, mu mulongo wà Melekisedekè.

638 Melekisedekè ewu Nganyi?

Bwalu Melekisedekè ewu, mfùmù wa Salèmà, (mbwena kwamba ne Yelusalèmà), mwànà wa mfùmù wa Nzambì udi mutàmbe bunène wa mu dyulu, (cyà bushùwà), wàkatwilangana ne Abraham pàvwàye wàlukila ùfùmùna ku dishebeya dyà bamfùmù, ne kumubèneshayè;

Uvwa kabidi Abranham mupèèshe cyàdiikùmì cyà byònsò; dyàmbedi ku dyumvwija mwikàle Mfùmù wa bwakàne, (dinanga dinène adi, Nyumà munène awu ku cibangidilu). . . Mfùmù wa bwakàne, . . . paanyimà pàà cyôci aci. . . Mfùmù wa Salèmà, mbwena kwamba ne, Mfùmù wa ditalala;

Kàyi taatù, kàyi maamù, kàyi bankambwà, kàyi ne mbangilu wa matùkù, anyì ne ndekeelu wa mwoyi;. . .

639 Ûvwa Nganyi? Kàvwakù mulediibwe to, Kàadyàkufwàku to. Ûvwa Nganyi? Ûvwa n’Nzambì, cyà bushùwà, nnànku, mu cindidimbì cidyanjididi cyà Mukalenge Yesù. Cìvwa ncyôci cyà bushùwà. Kàdi byàkakèngela bwà kulwilayè ku mukàjì, mu mùshindù wùdi wèwè mulwilè ku mukàjì awu. Ne byàkakèngela bwà kulwaYè mu mùshindù wùdi wèwè mulwè awu, bwà kukwaluja kùdiYè. Àlèluuyàh!

Ngàsà udi ukèmeshangana! mùshindù mwinè wùdi díyì dyà kalolo,
 Dyàkasungilà mukèngeledi mukwàte ne byà luse, mpofo bu mèmè!
 Musangu kampànda mvwa mujimìne, kàdi mpindyewu ndi mupetèke, ku ngàsà Wendè,
 Mvwa mpofo, kàdi mpindyewu nkàadi mmòna.

640 Ndi ngumvwa cìvwa cikèngela kwenzaYè. Nzambì wàkalwa mèmè, bwà ku ngàsà mèmè ngaamòna mwà kulwa Yèyè. Wàkangata mpèkaatù yànyì, bwà ku bwakànè Bwèndè ngaamòna mwà kwikala ne Mwoyi wà Cyendèlèlè. Ncìvwa mwà kudisungwila mèmè mwinè to. Ngiiikàdilù wanyì wùvwa wa ngènzàmpèkaatù. Ncìvwakù ne cyà dyenzamù nànsha cìmwè to. Mvwa “mulediibwe wa pa buloba, mufwimba mu bubì, mulwè pa buloba ngamba mashimi.” Ncìyikù ne mpùnga to, nànsha mukèsè; kantu nànsha kàmwè, nànsha mene dijinga.

641 Ambilà ngulube tǔng mùdiye “mupiile, mùdyadyaye búcyaфу,” mmwòmò’s? Tàngilà ùmòne ní wàkuteèleja. Ambilàbi cikòlòlò tǔng mùdìci “cipiile, mùdyadyaci bitàlù bifwè,” kàdi ùmonèbi cyàkwambilàci. Bu cyòci mwà kwakula mbifwànyine kwikala ne: “Endèlà yèbè.” Cyà bushùwà’s.

642 Kaa, kàdi ngàsà wa Nzambi udi mushintùlùle ngiikàdìlù ewu awu, ne mumpèèshe mpùngà wa kujingakù ne kujinga ngamba kufwà ne kwikala ne nyòòtà ne: “Dinanga ne musàngeelu Wèbè mbìmpè kùndi kutàmba mwoyi’s, Éyi Nzambi. Mwoyi wànyi newùKujingè.”

643 Davidi wàkamba ne: “Ànu mùdì ngulungù ùjinga kasulù kàà màyi amu, ki mùdì musùukà wànyi wùKujinga, Éyi Nzambi.”

644 Nzambi ùtu mupèèshe muntu nyòòtà ayi, bwà kuMukuukwilayè, kuMunanga, kuMukèba. Kàdi muntu ùdi yèyè ùyinyangakajila ku dibìikila dyà kùdì dyabùlù, ùya ùkaalakana bakàji ne bisànkasanka ne bintu byà pa buloba, ùteeta bwà kusànkisha bufùki bwà cijila bùdì Nzambi mutèèke munda mwèndè, bwà kuMunangayè Yèyè abu. Ùdi yèyè ùcitèekela pa bintu byà pa buloba. Kàdi, mwanèètù, pàdiye ànu ne wàshintùlùkù, ne mushimi wùdì ne tusàndà mwómù awu, ne mìshindù yònsò yà—yà bimvundù byà mu ciinà cyà màyi ayi, s’bikaadi bikezula ne twìshì twònsò tushipamù, ne Màyi makezùke a Nzambi matèeka munda mwèndè, mpèkaatù kèna mwà kucilengakù to. Amen.

Éyi mùshindù mwinè wùndìpu muMunangè’s
wè! Mùshindù mwinè wùndìpu muMunangè
bikolè’s wè!

Mwoyi wànyi, Muunya wànyi, byànyi Byònsò
mu Byònsò!

Mufùki munène awu mmulwè Musùngidi
wanyì,

Ne kaabujimà kònsò kàà Nzambi nkasòmbèle
munda Mwèndè.

Mutùlùlùke ùfùmina mu butùmbì Bwèndè,
bwalu-bulonda bwà kashidi bùdì ne mwoyi,
Nzambi ne Musùngidi wanyì wàkalwa, ne Yesù
ki cìvwà Dìna Dyèndè.

Mulelela mu cidiilù cyà nyama, mwenyi kùdì
bàà Kwàbò Sungasunga,

Nzambi wa tunyinganyinga awu, binsònji ne
dikèngà dyà pa lufù.

Éyi mùshindù mwinè wùndìpu muMunangè’s
wè! Mùshindù mwinè wùndìpu muMunangè
bikolè’s wè!

Mweyelu wànyi, muunya wànyi, byànyi byònsò
mu byònsò!

645 Éyì Nzambì wa yààya! Mmunyì mwàkafikà Ye ku dicyènza's? Muntu mmuteetètèète bwà kucifùnda. Muntu kampànda wàkamba ne:

Bu twètù mwà kuuja mbù ne mâyi a mufùndu,
Ne cituuta cyònsò pa buloba ciikàle kasàlà;
Bu maulu ónsò mwà kwikala mukànda
muvùnga,
Ne muntu yònsò mwikàle bu ne wèndè mudimu
mbu mufùndi;
Bwà kufùnda dinanga dyà Nzambì wa muulu

Mùshindù mwinè wàkalwà Nzambì wa mu Dyùlu awu
mubidi ne kwangata mpèkaatù yànyì mèmè!

Bwà kufùnda dinanga dyà Nzambì wa muulu
Bìvwa bifwànyine kukàmisha mbù;
Anyì nànsha mene bu mukànda muvùnga awu
mwà kukùmbana byònsò,
Nànsha bu wòwò mwolola kuumukila ku
ntengu yà dyulu too ne ku mikwàbò.

646 Nènku bwà kuvwijila bapyànyì bàà lupàndu elu ditèkemena dilelèlè, Yèyè wàkadicipila ku Yèyè mwinè ne Úvwa mwà kutùbiiisha ku lufù ku matùkù a ndekeelu, kutùpèèsha Mwoyi wà Cyendèlèlè. “Ne muntu nànsha umwe kèna mwa kubànyènga mu cyanza Cyànyì nànsha.” Amen.

Tùsambilàayi.

647 Udikù mupiiile bwà dibèngà dyà dinanga Dyèndè ku maditàmishi anyi? Ukàadi munyeemènyèeme Buumùntù Bwèndè bubènesha, Kampànda munène utu mukwenzè cyùdi aci ewu anyi? Kàdi mpindyewu's ki wèwè ewu, mu dindà emu, too ne díbà edi mu nsòmbelu webè, ne ncyaci cikupèèsha mpùngà. Udi muswè kutùngunuka ne kwikala ne mwoyi anyi? Kùdi mùshindù ànu wùmwèpelè wà kwikala ne mwoyi, ngwà kwitabuuja Mukalenge Yesù. Wèwè, kuumukila munda mwà mwoyi wèbè, wèwè mwitabùùje ne Yèyè m' Mwànà wa Nzambì ne muMwitàbe bu Musùngidi webè, ne mwitabùùje ne Nzambì wàkaMubiisha ku lufù bwà dibingishiibwa dyèbè, wèwè muswè kudiiitaba mwimànyine pa cyòci aci, ndyèbè wèwè mpindyewu.

648 Udikù mwà kwela cyanza cyèbè muulu anyi? Musùukà kampànda wà kawùyi ne kanyinganyinga, wùdi muswè kunyingalala mu dindà emu, ambà ne: “Úmvùlùkèku, muiyiishi, mwanètù, patùkaadi tusambila apa. Mèmè pàànyì ndi mupangile. Ndi muyè kashààla wa ku èkèleeziyà, kàdi ndi—ndi mumanyè ne ncitukù—ncitukù mwanji kupeta cyùdi wamba aci to. Kacya ncitukù mulediibwe ku Nyumà awu to, Mwanètù Branham. Ncitu ànu—ncitu ànu muMupetè to, kwàjikì. Ndi muswè bwà ùsambidilèku, bwà Nzambì àMumpèèshèku mu dindà emu.” Nzambì àkubènèshè, mukalenge. Nkufwànyinekù kwikala mukwàbò anyi? Ambà ne: “Nzambì, ngenzèku cyùdi

Wèwè muswè bwà mèmè kwikala aci. Ndi muswè bwà Wèwè wikalè. . . Ndi muswè kwikala cyùdì Wèwè muswè bwà mèmè kwikala aci. Nkààdi mubèngèbènge dinanga Dyèbè ku maditambishi.” Nzambi àkubènèshè, mwanàànyì wa balùme.

649 Anjì indilaayikù kakesè cyanàànà mpindyewu.

Bu twètù mwà kuuja mbû ne mâyi a mufundu,
Ne maulu ônsò mwà kwikala mukàndà
muvùnga;

Ne cituuta cyônsò pa buloba ciikàle kasàlà,
Ne muntu yônsò mwikàle bu ne wèndè mudimu
mbu mufundi;

Bwà kufùnda dinanga dyà Nzambi wa muulu
Bìvwa bifwànyine kukàmisha mbû;
Anyì mukàndà muvùnga awu kawùyikù
mufwànyine kukùmbana byônsò to,
Nànsha bu wôwò mwolola kuumukila ku
ntengu wa dyulu too ne ku mukwàbò.

Kaa, dinanga dyà Nzambi, mùshindù mwinè
wùdidi dibanjìke ne dikezùke's wè!
Mùshindù mwinè wùdidi kadìyi kwondola
kumana ne dikolè!

Neditungunukè ne kwikala kashidi ne kashidi,
Musambu wà bansantu ne Banjèlo.

650 Nzambi munanga, ncyà bushùwà ne mwedi wa kasàlà udi mufunde méyi awu awu úvwa ànu mùdì bakwàbò bààbùngì bàà ku beena kwitabuuja Bèèbè aba, mwikàle ùkèbulula, ùteeta bwà kupetakù méyi bwà kucijikula. Ne mbifùndiibwe mu Bible ne: “Kàbidì, bwalu muyiishi úvwa ne lungènyì, mmukèbùlùle ne mutèèke mu bulongàme méyi àbùngì.” Kaa, mùshindù mwinè wutùdì bafwànyine kunanga kupeta mwakulu ne myakù bwà twamònakù mwà kuumvwija bantu cidìci menemene's, kàdi kì ncifwànyine kupeteka pa mishikù yà cifwàkà to. Cyendèlèèlè cijimà, kakùyì mpatà to kacýàkucìbuululakù to, mwàkatùùlukà Nzambi wa mu Dyulu pa buloba bwà kusùngila bangènzàmpèkààtù bakwàte ne byà luse, bajìmine, bakèngeledi bàà luse abu.

651 Ndi nKulòmba, Taatù, bwà ku ndambù ewu wa méyi àdì kaayi makòsòlòkàngàne, anyì àdì makòsòlòkàngàne mu dindà emu aa, mùvwàbi bikèngela bwà mèmè kwikala mwambè, bwà muntu kampànda wàpetakù ditalala ne disànkishiibwa ne dikànkamikiibwa dikolè, udi munyeemè bwà kupeta mwaba wà cinyeemenu awu. Ne swàku bwà musùukà wèndè wèlè lwongò mu mulayi wùvwà Nzambi mudicipile awu ne, Yèyè neàmubiishè ku lufù ku ditùkù dyà ndekeelu. Byanza byàbùngì mbyèdiibwe muulu, mu citanda emu, mu tabernacle emu mene. Nzambi, bàpèèshèku ditèkemena dyà dishimàte adi, mpindyewu mene. Swàku bèlè lwongò mu Lubwebwe lwà bikondo. Nànsha bu

mbû mwà kutànkakajangana byà bibì bishi ne mâtù àbò makesè awu mwà kusànkuka, bôbò bàdi ne lwongò, mulyi wà Nzambi. Nebàshaalèpu ne: “Nzambi ngudi muCyàmbè. Yèyè kèna mwà kushimakù to.”

⁶⁵² “Ewu udi utèeleja Mèyi Àanyi,” àngàateeci kuyiisha mu dindà emu awu, “ne wìtabuuja Yèyè udi muNtùme, Yèhowàh, ùdi ne Mwoyi wà kashidi; ne yèyè kàakupicila ku cilumbulwidi to, kàdi wàmanyi kuumuka ku lufù ne wàyi ku Mwoyi.”

⁶⁵³ Éyi Wa Cyendèlèlèlè we, bèneshàku bôbò abu leelù ewu. Ne swàku bwà muntu yònsò kaaba aka udi kàyi mwinshì mwà Mashi awu, musùukà wèndè kawùyikù mukùdimùne mucima to, swàku bwà byènzekè ànu patùdi twakulangana apa, Mukalenge. Kumbajàku bwalu-busokoka abu. Byònsò mByèbè Wèwè. MbiKulàmbula Wèwè. Ndi ndòmba bwa Ùbàpèeshèci, Mwoyi wà Cyendèlèlèlè awu. Swàku bwà, dīngà ditùkù, ku mwelelu wà m̄ayi wà dyàmwàmwa, patùdi ku umwè ku umwè tupicila mu cibandabanda aci apa, swàku bwà twatwilangana kwòkù aku kwìkalàbo kabàyi bàmbilangana kabidì ne “wàya bīmpè” aku to.

Dīngà ditùkù netùkafikè ku musùlù ku ndekeelu wa cikondo,

Piikalà meeji a ndekeelu a tunyinganyinga mayè;

Nekwìkalè Muntu mwindile watùleeja njila,
Kabyàkukèngela bwà mèmè kusabuka Yadènè
nkààyaanyi nànsha.

Nekwìkalè Kampànda, Muntu kampànda
mwindile wàndeeja njila,
Kabyàkukèngela bwà mèmè kusabuka
Yadènè . . .

⁶⁵⁴ Ewu yònsò udi ne ditèkemena adi, elà cianza cyèbè muulu mpindyewu paùdi ubàndululula mutù wèbè apu.

Kabyàkukèngela bwà mèmè . . .

Mpindyewu Mukuukwilaayi ànu cyanàànà. Diiyiisha dyàjiki. Kanwènakù ne disànka anyi? Nzambi mmudicipe ne kí mMufwànyine . . . Nzambi mmudicipe ne neÀtwilanganè neenu kuntwaku.

Yesù wàkafwà bwà kufuta cibawu cyà mpèkaatù yànyi yònsò;

Mèmè piikalà mīdimà . . . (Udi wamba bishi?
Kalonda nkayè mwamwamwa.) Yèyè neikalè
mungindile,

Kabyàkukèngela bwà mèmè kusabuka Yadènè
nkààyaanyi nànsha.

Mīngà misangu ndi mulekelela, ne mucyòke . . .

Mukuukwilaayi ànu cyanàànà mpindyewu.

. . . mbimwènèke ne balundà bàanyi bàkaadi
bayè bônso;

Kacya nukààdikù badyatè dikàsà mu mwaba awu anyi?

Kàdi kùdi dyeji òmwè òdì ònkòleshà ku
mwoyi . . . (Mulayi awu wùvwa wà bishi?) . . .
civwija mwoyi wanyi ne disànka,
Kabyàkukèngela bwà mèmè kusabuka
Yadènè . . .

⁶⁵⁵ Mpindyewu, nwènu bànà bàà mulayi, Mukuukwilaayi bwà
dicyènza.

Kabyàkukèngela bwà mèmè kusabuka Yadènè
nkààyaanyi nànsha,
Yesù wàkafwà bwà kufuta cibawu cyà
mpèkaatù yanyi yônso;

Ncinyi cidi cyènzekà mpindyewu?

Mèmè pàngààmònà mîdimà, Yèyè neikalè
mungindile,
Kabyàkukèngela bwà mèmè kusabuka Yadènè
nkààyaanyi nànsha.

Pàngààfikà ku musulù . . .

Yônso wa kunùdi ùdi munkaci mwà kulwa. Kùdi
mundidimbì munène, mufiike mwimàne kumpàlà kwèbè aku.
Nciibi cinène. Neùbwelèmu, òmwè dyà ku matùkù àdi panshì
aa, pàmwàpa kumpàlà kwà ditùkù edi kujikadi, pàmwàpa
kumpàlà kwà èkèleeziyà kwoyayè mu dindà emu. Neùbwelèmu.
Musangu wónso wùdi mwoyi awu wùtuuta, udi usemenakù ne
cidya cimwè.

Kàdi mèmè pàngààmònà mîdimà, Yèyè neikalè
mungindilekù,

Mmwambè ne ki cyènzaYe. Wàkadicipa ne ki cyènzaYe.

Dìbà adi kabyàkukèngela bwà mèmè kusabuka
Yadènè nkààyaanyi nànsha.

⁶⁵⁶ Éyi Mukalenge mubènèshìibwe, myoyi yètù mmyùle tètè,
mu dindà emu, biyiila ne panshì.

⁶⁵⁷ Patùdi twela meejì bwà pìimanà dituuta dyà mwoyi, ne
mungàngà mukàjì ùshindikila musààmù ùnyùnguluka mutù
wèbè. Ne byanza byèbè, kùciyi kàbìdi mwà kubìnyungisha.
Byanza byèbè bimanè kulwa dibwe dyà mashika. Bànà bèèbè,
mamwèbè, bananga bèèbè bàpaasalala ne mbilà mikolè ne
bàdila myadi. Ciibi cinène aci cyùnzuluka, dyàmwàmwa. Yèyè
neikalè mwindile.

⁶⁵⁸ Davidi wàkamba ne: “Mèmè mukatèèkèle bulààlù bwanyi
mu ifernò, Yèyè neikalèmu.” Kabyàkukèngela bwà mèmè
kumusabuka nkààyaanyi nànsha. Pààbangà tunsàmpùsàmpù
twà màyi a musulù kunsàmpukila mumpàla, Nzambi neàngatè

bwàtù bwà disùngila, àtùlombòle buludì too ne dyàmwàmwa. Mmulayè ne ki cyènzàYe. Davidì mupròfètà wákamba ne: “Èyowà, nànsha mèmè nkòsolwela mu cibandabanda cya mundidimbì wà lufù, ncyàkuciina cintu cibi nànsha cìmwè to. Wèwè udi naanyi. Dikombo Dyèbè ne mulangala Wèbè, bidi binkànkamika.”

659 Mukalenge, tudi ne disànka dîngì leelù ewu, dyà ne tuvwa babadiibwe mu mupyànyì wà mulayi. Leelù tudi munda mwètù ne Mwoyi wà Cyendèlèlè, bwalu tudi banangè Mukalenge Yesù ne baMwitàbùùje, ne biitàbe Dîyì Dyèndè ne Dilongesha Dyèndè. Ne Yèyè mmutùpèeshe, bu citampi cyà diitabuuja dyètù, Nyumà Mwìmpè, citampi cyà Nyumà Mwìmpè. Diitabuuja dyètù munda mwètù ndyelè lwongò. Ne nànsha mùdìbi ne misangu yàbùngì tudi tucipila mu mindidimbì mifiike, misangu yàbùngì tudi tutetuka patùyaayà mu njila, kàdi lwongò lwètù lùdi ànu kacya lwàkwàta. Kùdi cintu kampànda mwómù amu, dyàmwàmwa, cìmwèka bu cìdi cilombolà, cyàmba ne: “Tùngunukà. Tudi tutùngunuka.”

660 Nzambi, tùbènèshèku. Tudi Neebè dijinga. Tùlamèku misangu yònsò bàà lulamatu ne bambì bàà bulelèlè too ne ku cikondo ciWàlwà bwà kutwàngata, netùKutùmbishè mu bikondo bìdi kabìyi ndekeelu abi. Nènku ditùkù adi patwìmanà pa buloba. . . Makàsà Èndè mabènesha awu kaàyikù mmanjì kulenga buloba to. Ki Yèyè udi mwimàne wàwa, mu mpeepèlè; ne bansantu ne bapikula bàà bikondo byònsò, bàà mu cilù cyònsò, cyà kumpàla, ciibìdi, ciisàtù, ciinâyì, ciitànù, ciisambòmbò, ne cyà mwandamutekète, bònsò biimàne kwàka bavwàdika bwakànè Bwèndè; tudi tuMwasa cifulu cyà butùmbi bu Mfùmù wa bamfùmù ne Mukalenge wa bakalenge, ne twimba myandà yà bupikudi ayi. Myoyi yètù yìdi mikwàte ne bya luse eyi neyizakalalè patwàtàngilà Ewu wàkatùnanga ne kuDifila bwètù twètù. Patùvwà bangènzàmpèkaatù bàvwàbo kabàyi mwà kunanga, Kilistò wàkafwà bwà twamòna mwà kusùngidiibwa. Tudi tuKwela twasàkidila bwà cyòci aci, Taatù, mu Dîna dyà Kilistò. Amen.

661 Nudi baMùnangè anyi? Kaa, mùshindù mwinè wùdiYe wa cyà bushùwà's wè. Kanwènaayikù ànu nudyùmvwà bu ne nudi ànu baswè kutùpika mu mùshindù kampànda kàdi kuMwela citupà anyi? Kanwènaayikù mwà kunanga ànu kukalaba too ne kuya kalenga ku makàsà Èndè anyi's, munùdi bamanyè?

662 Nudi bamanyè's, kale wàwa kùvwà bantu bàlwa ku masangisha àànyì mu Phoenix, mu Arizona, bàmba ne: “Ndi muswè kuyiikilanganakù Nendè pa bwalu abu. Ndi muswèku ngàmbè ne: ‘Mukalenge, Wàkannanga pààkalwà kajila kàànyì kabwicidile bikolè.’” Mèmè ndi muswè kuyiikilangana Nendè pa bwalu abu kumpàla kwà kusabuka. Ndi—ndi njinga kuMumòna. Ndi—ndi—ndi njinga ànu kuMumòna. Pàndi ncinka

mûngàadyûmwà, mwikalà kaamwoyi kàanyi kakesè aka mwà kuzakalala pângààmumònà mwimàne mwaba awu.

663 Misangu yàbûngì nkàadi ànu mudìkonkèkònke ne: “Mvw’a kujingaku kwikala muumvwè Dîyi adi dyàmba ne: ‘Lwáyi kûNdi, nwênù bônso bàdi bàditàcisha ne mudimu mukolè ne bambùle majitu makolè. Mémè nênnùpèèshè diikisha.’”

664 Pàmwápa ncyàdyàkuumvwakù cyôci aci byètù byà cyà bushùwà ebi mwàkabyàmjàYe musangu awu amu to, kàdi ndi muswèku mMuumvwè wàmba ne: “Edi nditùkù dyà ndekeelu. Udi mwenzè bîmpè, musadidi Wanyi mwîmpè ne wa lulamatu, mpindyewu bwelàaku mu masànkà a Mukalenge àvwa makulongolwela.” Kacya ku dîbà kaayi?

665 “Kacya pawàkasungidiibwà anyi?” To, mwanèètù.

666 “Kacya ku difùkà dyà dyulu ne buloba, pângààkakumònà ne kukumanya, ne kukulongolola ku Mwoyi wà Cyendèlèlè,” wàkabèneshiibwà musangu awu. “Bônso bàdiYe mudyànjlè kumanya, mMubàbîikile.” Mmwômò anyi? “Bônso bàdiYe mubiikile, mMubàbingishe. Aba bàvwàYe mubingishe, Úkaadi mumanè kubàtumbisha.” Ki bwalu mbwòbù abu’s. Yèyè wàkadyànjlà kutùmanya, kutùbîikila, kutùbingisha, ne tukàadi batùmbishùbwe pàmwè Nendè, ku ndekeelu kwà buloba, tuya batàngile ku difùtu dyètù. Kanwènaayikù ne disànkà anyi? Bushùwà, s’ncifwànyîne kunùfikisha ku diMunanga. Paùvwà kùyi mwà kudikwàcisha wèwè mwinè to, kàdi’s ki Yèyè ewu wálu ne wàkwenzèdi cyôci aci.

667 *Mwonji Wùdi Wùswikakaja Wùbeneshiibwè*, Mwanèètù wa bakàji Gertie. “Myoyi yètù mu dinanga dyà bwena Kilistò,” patùcidi ne bwobùmwe bukesè bwà dikuukwila kaaba aka mpindyewu apa, pashiishe netùsambidilè babèedi. Nzambì ànùbènèshè. Nwênù bèdi byanza byènù muulu kùdi Kilistò mu dindà emu abu, kèbaayi mwaba bwà kukuukwila, kuMukwàcila mudimu.

668 Mpindyewu, tuMukuukwilaayi ànu cyanànà mpindyewu, twètù bu disangisha, nwênù bônso ba-Méthodistes, beena église de Dieu, beena Assemblées de Dieu, ba-Presbytériens, ba-Luthériens, beena Kàtòlikè. Bônso cyàpàmwè mpindyewu, twîmbààyaaku mpindyewu.

Mwonji wùdi wùswikakaja
Myoyi yètù mu dinanga dyà bwena Kilisto
wùbeneshiibwè;
Bwobùmwe bwà meeji a buuwetù
Mbufwànàngàne ne bùdi mu Dyulu.
Kumpàlà kwà nkwasà wa butùmbi wa Taatù
wetù,
Nkutùdi twicikija disambila dyètù dyà kapyà
kakolè;

Diciìnà dyètù, ditèkemena dyètù, twipàcilà
twètù, mbyà mwomùmwe,
Dikànkamikangana dyètù ne dikòngangana.

Patùdì tutàpuluka,
Bìdì bitùsaama ku mwoyi;
Kàdì netwìkalè ànu baswìkàkàne mu...
(Mbanganyì bàdì ba-Méthodistes, ba-
Baptistes, ne bònso?)
Ne batèkèmène bwà twatwìlanganakù
cyàkàbìdì.

⁶⁶⁹ Aci kacyèna cinwènzakù bîmpè anyi? Tukudimukààyi
tùlabulanganèku ku cyanza muntu ne mukwèndè mpindyewu,
patwìkalà tuwimba cyàkàbìdì apa.

Kumpàlà kwà . . .

Labùlàngànaayi ku cyanza, ne muntu kampànda paanyimà
pèèbè, kumpàlà kwèbè, ku nseke yònsò yìbìdì.

. . . nkwasà wa butùmbi,
Nkutùdì twìcikìja disambìla dyètù dyà kapyà
kakolè;
Dikànkamikangana dyètù ne dikòngangana
dyètù.

Mpindyewu patùdì tutàpuluka,
Netùnanganè muntu ne mukwèndè.

Bìdì bitùsaamisha . . .

Nudikù nujinga bwà disangisha kutùngunukadì anyi?
Nwamònu anyi? Ki mutùdì twela meeji nànkù.

. . . bitùsaamisha ku mwoyi;
Kàdì netwìkalè ànu baswìkàkàne mu myoyi
(mu umwe),
Ne batèkèmène bwà twatwìlanganakù
cyàkàbìdì.

Katùyì batwìlàngàne kàbìdì apa to, mu Ditùkù dyà butùmbi
adi mmutwàtwìlanganà.

⁶⁷⁰ Mpindyewu, Taatù, akìdìlàku dikuukwìla dyètù mu dindà
emu. Angàtaku Dìyi ùDìkùne mu myoyi yà beena kwitabuuja.
Swàku bwà kabàtànkaakajìbu ànu cyanààna to, leelù bàbànda
mààlabà bàpwèka, kàdì swàku bwà Méyi aa àpetèku ciikishìlu
mu mwoyi wà mwena kwitabuuja yònsò. Bwà kumanya nùnkù,
ne: “Nzambì mmudicìpìle ku mucìpù, ne kùdì bintu bìbìdì bìdì
kabìyi mwà kukùdimunyiibwa. Dìbènga-kukùdimunyiibwa
dyà Nzambì, mbwena kwamba ne, kabyèna mwà kwenzekakù
to bwà kushimaYè, bwà bapyànyì bàà lupàndù elu bààmòna
mwà kwìkala ne ditèkemena dikolè, dishimàte ne ditwishìlwe
edi, lwongò mu musùkà.” Bwà kumanya nùnkù, ne: “Nzambì
mmutùlayè, ku didìcipìlà dyà ku mucìpù. Cìmwè ncyà ne, Yèyè

kéna mwà kushima to; cikiwàbò ncyà ne, Yéyè mmudicipile ku mucipù kusàkidila pa cyòci aci ne, Yéyè neatùbiishè ku lufù ku ditùkù dyà ndekeelu ne neatùpèèshè Mwoyi wà Cyendèlèèlè.” Bamanyè, ne: “Paanyimà pàà twètù bamanè kubiikidiibwa, Yéyè mmwambè ne Wàkatùmanya kumpàlà kwà difùkà dyà dyulu ne buloba, ne mudyànjile kutùlongolola ku ditèekiibwa dyà bânà ku Yesù Kilistò. Ne Yéyè wàkadyànjila kutùmanya. KutùbiikilaYè. Ne pàakatùbiikilàYè, kutùbingishaYè.” Katwèna mwà kudibingisha twètù nkààyeetù to, pa nànkù Yéyè wàkatùbingisha ku lufù lwà Mwan’Èndè Sungasunga. “Aba bàdìYe mubingishe, Ùkaadi mumanè kubàtùmbisha.” Dìyì dikaadi dimanè kwambiibwa. Ne twètù tudi ànu mu njila, twenda tuya, twenda tucyònkòmokela mu njila batàngile ku Butùmbi.

⁶⁷¹ Pèèshakù bantu diitabuuja, ne swàku bwà tuubiibidilu tukesè ne tuntu tùdì tulàmàte bantu aba atu, bàdikùpùlùleku bàsuulukè ku twòtù atu, mu dindà emu, ne Dìyì dyà Nzambì dìdì lwongò lwà musùukà, lushimàte ne lwà cyà bushùwà elu. Swàku bàdikùpùlùleku ku biibidilu byàbò abi, tuubilunji twàbò twà cijiì atu. Ne bintu bikaadi. . . Mwàkambà Pòlò, mu citùpà cyà diyiisha edi cidì kumpàla eku mu ndambù wa matùkù ewu ne: “Tùteekàayi ku luseke bujitu bwònsò, ne mpèkaatù udi utùcìncimika bipeepèlè nùnkù awu, bwà twamòna mwà kunyeema ne lutùlù lubilu lùdì lutèekibwe kumpàlà kwètù; batàngile mubangi ne mujikiji wa diitabuuja dyètù, Yesù Kilistò, Wàkateeciibwa mu mùshindù wònsò bu twètù, kàdì kàyi wènza mpèkaatù to.” Byàkaanyishiibwa bwà Yéyè àteeciibwè, kàdì Kààkacyùka diteeciibwa adi to. Ne twètù tudi tuteeciibwa bwà kwenza mpèkaatù, kàdì katùyikù mwà kubicyùka to. Bwalu Mwoyi wùdì munda mwètù wùdì lwongò lwà kwètù kwà Cyendèlèèlè kutùyaaya, ne tudi tucilàma cinsantu mu mwoyi wètù.

⁶⁷² Mpindyewu, kùdì bààbùngì bàdì Sàtaanà mukèngèshe ne ntàtu. Tukàadi tudìlongolola bwà kubàsambidila, Taatu. Swàku bwà ne, pàdìbo bènda bàpicila mwinshì mwà Dìyì dyà Nzambì leelù ewu apa. . . Dìyì dyà mushinga mukolè dyàyiishiibu adi, Bible mwikàle ùfla bujaadiki, Banjèlò bàà Nzambì biimàne pabwìpì apu, ne Nyumà Mwìmpè wa butùmbì awu, kumutù kwà byònsò, nyewu mwimàne kaaba aka bwà kufidila Dìyì bujaadiki. Mpindyewu, Taatu, pàdìbo bènda bàpicila mwinshì mwà Dìyì dyà mulayi apu, mu dindà emu, swàku bwà bùumukekù mwaba ewu ne mubidi tumatuma. Bwà kuumushabò milonda yàbò yà balèma, ne kulekelabò tùkalù twàbò twà balèma ne—ne tulàalù twàbò tùvwabo balààdilepù atu, ne kwikalabò ànu basàngàjìibwe. Enzàku nànkù, Mukalenge. Swàku bwà bàalukile mu disangisha dyàlondà mùdìbo baanyishiibwe bwà kulwa amu, anyì mu èkèleeziyà yàbò sungasunga, bènda bacyònkòmoka, bàleaja ne mbintu binènè kaayi bidì Kilistò

mwenzè. Tudi tukùmbaja mudimu ewu bwà butùmbi Bwèbè, mu Dîna dyà Yesù. Amen.

⁶⁷³ Bikèngela bwà ndombèku luse bwà mulayi wùmvwà mwenzè ne, mu dîndà emu netwàngatè nshapità wa 7, kàdì nciyi mukùfikè to. Nènku bikèngela tukòsèku dîbà dikesè kaaba aka bwà—bwà eci, bwà mulongo wà babèèdi. Nènku mpindyewu, dilòlòlò edi, bu Mukalenge mwà kwanyisha, netwàngatè nshapità wa 7, bwà kujandula ne Melekisedekè ewu ùvwa Nganyì. Mbanganyì bàdiku baswè bwà kumanya? Kaa, tudi ànu tupweka batàngile kùdiYe, bwà kujandula ànu menemene ne Yèyè ùdi Nganyì. Ne Mifùndù yìdi yàmba ne Yèyè ùdi Nganyì. Nwamònu anyi?

⁶⁷⁴ Kàdì Scofield yèyè mmwambè ne cìvwa m’“bwakwidi.” Mmuniyè mùdici cìfwànyine kwikala bwakwidi, kabùyi ne ntwàdijilu anyi ne ndekeelu? Nudi numòna’s, kacìvwa bwakwidi to. Ùvwa m’Muntu, Melekisedekè (Dîna), Mupersona.

⁶⁷⁵ Mbyenzè bu ne, nciyi ndyombolangana to, kàdì beena Science Chrétienne bàdi bàmba ne Nyumà Mwîmpè n’“dyeji kampànda.” Kàdì Bible mmwambè ne: “Yèyè, Nyumà Mwîmpè awu.” Ne Yèyè’s mmupinganyi muleeji-muntu. M’Mupersonà; kî ndyeji kampànda to. M’Mupersonà. Kakùyi mpatà to.

⁶⁷⁶ Ne Melekisedekè m’Muntu, Muntu uvwa kàyi ne ntwàdijilu wa matùkù anyi ne ndekeelu wa bidimu. Kàvwa ní nnè taatù ní nnè maamù, ní nnè bankambwà to. Nènku netùjandulè ne Yèyè ùdi Nganyì, bu Mukalenge mwà kwanyisha, dilòlòlò edi, ku Dîyi. Nudi baCinangè anyi? Kaa! “Dîyi Dyèbè dîdi mwèndù mu kajila kàanyi ne ku makàsà àanyi.” Kaa!

⁶⁷⁷ Mpindyewu, wèwè udi wamba ne: “Mwanèètù Branham, ncyèna nCyùmvwà cyònsò to.” Nànsha mèmè pàanyi.

⁶⁷⁸ Kàdì, mûngà musangu, mvwa nyiisha mu Kentucky mwàmwa. Nènku bwà bàmwè bàà ku beenyi, ne beena Kàtòlikè ne bakwàbò bashiilèshiiilàngàne, bàdi kabàyi mwà kuumvwa mùdi bintu byà ndòndò, bibanjikè byà mu Mifùndu ebi. Mvwa nyiisha pa dyondopa dyà kùdi Nzambì. Mwànà mukesè wa bakàji mwikàle ku makàsà kutupù kutwàlayè . . . Kàvwa nànsha ne bidimu dikùmi ne bitaanu to, ùvwa ne mwànà mukesè wa mu dibòkò, ne mwànà awu ùvwa ne tunèkè twà tuzakaja mubidi. Mèmè kwamba ne: “Mwanèètù wa bakàji, mwànèèbè awu, ùdi ùsaama cinyi?”

⁶⁷⁹ Yèyè ne: “Ùdi ne dîsaamà dyà ùzakalala.” Kàvwa mumanyè mwà kucibiikila ne ntunèkè twà tuzakaja mubidi to. Kàvwa mumanyè mwà kucibiikila to.

⁶⁸⁰ Kakàjàànà aku kakàyikù pàmwàpa kanji kuvwàla bisàbaatà ku makàsà to, kàcya pèndè bààmulela. Munanga wa muntu kampànda, ne nsukì mile mipwekè. Mèmè ne: “Udi witabuujà anyi?”

681 Ki twísù tukesè tutòòkòlòke bu cyamù cifiike atu, kuntàngilatù. Yèyè ne: “Èyowà’s, mukalenge. Ncyà bushùwà ne ndi ngiitabuuja.”

682 Mémè kwambula mwànà mukesè wa mu dibòkò awu. Nènku pàmvwà munkaci mwà kumusambidila apu, kulekelayè kuzakalala. Uh-huh. Ki disaamà adi kupàtukadi, kupàtukadi.

683 Pààkacyàbu, mvwa ngenza bulembi bwà nshìndì, lwà ku luseke lwà mukùnà kampànda. Mémè kuumvwa bantu basòmbe mwab’awu bàyiikila, scie wa kale wà mabaya wùdila. Ki mémè kudìfinda e kufikapù. Mvwa ngenza bulembi bwà nshìndì. Bàvwa bààkula bwànyì mémè, basòmbe mwab’awu, bàcyànkunya mfwankà ne bàtwìla matè, mabèjì àbùùka, nùнку ewu. Nènku, mpindyewu, bàvwa bàyiikilangana pa disangisha dyà dilòlò divwà didyànjlile adi. Umwe wa kùdìbo kwambayè ne: “Mémè mvwa mumòne mwànà awu. Ndi muyiilèku, mu dindà emu. Kèna ùzakalala to, too ne mu dindà emu.” Nwamònu anyi? Yèyè ne: “S’civwa cintu ànu cilelèlè eci’s.” Nènku ùvwa ùtwìla matè.

684 Ne bàvwa beeyèke bingoma ku mucì, ki mémè kudyàmbidila ne bìvwa bìmpè bu mémè mwà kudìmanyisha. Nudi bamanyè’s, bàvwa pààbò ne makòkyanganyi a bìjì a bukwà ne bwena, kuntwaku. Nènku, mémè kuseemena. Mémè kwamba ne: “Mwoyi wènù awu, bânà bèètù.”

685 Mulùmýànà munène menemene, uvwa mumwèke bu ne ki uvwa wakula awu, ùvwa ne mfwankà uvwayè ùcyànkunya mukana mwèndè, nùнку ewu, lwà ku luseke menemene nùнку ewu, ne nshìngù munène, mule. Ne ùvwa mwasè cifulu cinène menemene cyà kale, cipwekeshila lwà mumpàla. Kukènzakanayè e kummòna. Kwololayè cyanza e kukwàtayè cifulu aci, kucitùulayè, kuminayè mukuci, kuminayè mfwankà uvwayè ùcyànkunya awu, kwambayè ne: “Èè mwoyi, mpaasàtà.” Nwamònu anyi? Èyowà’s, mukalenge. Kaneemu’s. Ne ncyà bushùwà. Mwinè mwàkapìtaye nendè munda amu, ncyèna mumanyè to, kadi wàkamuminà.

686 Nènku, dilòlò dyàkalondà, pàngààkaalukilà kuntwaku, kùvwa muntu uvwa muswè kukòkanganakù naanyi ndambù. Ùvwa ùya mu èkèleeziyà kampànda uvwa kàyì witabuuja dyondopa dyà kùdì Nzambì to. Pa nàнку, ewu ùvwa èkèleeziyà wa ba-Méthodistes, wa ku White Hill, mu Kentucky. Ki yèyè—yèyè kuya ku . . . Ùvwa mwimànyine pambèlu. Ùvwa ne mwéndù ku cyanza. Ki kwambayè ne: “Ndi njinga ngàmbèkù bwalu, muyiishi. Mémè ncyèna ànu mwà kwitaba Aci to, bwalu ncyèna mwà kuCimòna to.”

687 Mémè ne: “Kùyì mwà kuCimòna?”

688 Yèyè ne: “To.” Yèyè ne: “Mémè ndi mubèèdì, mémè mwinè. Kadi,” yèyè ne, “ncyèna ànu mwà kuCimòna to.”

Mémè ne: “Utu musòmbèle penyì?”

Yèyè ne: “Ku luseke lukwàbò kwàka pa Big Renox.”

Mémè ne: “Èè, neùkafikè kwèbè kumbèlu bìshi?”

Yèyè ne: “Èè, s’ngèngèndè lwà makàsà too ne kwànyì kumbèlu.”

Mémè ne: “Udikù mwà kumòna kwèbè kumbèlu anyi?”

Yèyè ne: “To, mukalenge.”

Mémè ne: “S’kùdi mídimà mikolè, ne mavuba mabwikile.”

Yèyè ne: “Èyowà.”

Mémè ne: “Newàlukilè kumbèlu bìshi?”

Yèyè ne: “S’nnè mwéndù ewu.”

Mémè ne: “Mwéndù kawèna wùfila bukènkè njila mujimà too ne ku nzùbu to.” Mémè ne: “Uyààya bìshi?”

Yèyè ne: “Kaa, s’ndi ngendela ku mwéndù.”

689 Mémè ne: “Mmwómò. Udi ne bukènkè bwà mwéndù mpindyewu, ne musangu wónsò wùdi wela cidya nùнку ewu, bukènkè nebùtungunukè ànu ne kuleeja kumpàlà kwèbè. Wèwè mutùngùnùke ànu ne kwenda kuya, bukènkè nebùtungunukè ànu ne kwenda kuya neebè.”

690 Nèнку enzá nàнку awu mu dindà emu, wèwè udi dijinga ne Kilistò, Mwakwidi Munène, Mukwakwidi bwà bubeèdi bwèbè, anyi bwà màsaamà èbè, anyi bwà musùukà wèbè. Udi mwa kupanga kuCyùmvwa. Twètù katwèna tuumvwa to. Kàdi mbatùtùmine dýì bwà twètù “Kwendela mu Bukènkè mùdiYè Yèyè mu Bukènkè.” Elà cidya cìmwè mu Bukènkè. Ne paùdi ne Bukènkè ku luseke lwèbè, Bukènkè abu nebùkenkeshè too ne ku ditùkù dipwàngàne. NeBùlamè kajila kumpàlà kwèbè.

Nèнку netwèndè twenda tubànda ne cibeeba
 cyalàbàle cyà butùmbì cyà kale eci,
 Ngenda ngambilangana kwónsò kùnyaaya ne,
 Mbipicìbwe ne mémè mwikàle mwena Kilistò
 wa cyena-kale, Mukalenge,
 Pamutù pàà nì ncinyì cyónsò cìndiku
 mumanyè.

Kacya nukàadikù bumvwè musambu wà kale awu anyi?

Kakwèna cintu nànsha cìmwè bu mwena
 Kilistò wa cyena-kale nànsha,
 Bwà kuleeja dinanga dyà bwena Kilistò;
 Tudi twendela mu cibeeba cyalàbàle cyà
 butùmbì cyà kale,
 Ne twenda twambilangana kwónsò kutùyaaya
 ne,
 Mbipicìbwe ne mémè mwikàle mwena Kilistò
 wa cyena-kale, Mukalenge,
 Pamutù pàà nì ncinyì cyónsò cìndiku
 mumanyè.

691 Mémè ndi ànu muwùngàgè. Èyo. Mpindyewu netùsambidilè babèèdi. Katwèna. . . Katwèna twamba ne tudi mwà kwondopa babèèdi to. Twètù bacyàmbè, tudi twamba cintu cyà mafi. Mubèèdi yònsò udi kaaba aka ùkaadi mumanè kwondopiibwa. Ki cidì Mufùndù mwambè. “Ku mibùndàbùndà Yèndè twàkondopiibwa.” Ncyà bushùwà anyi?

692 Ngènzàmpèkààtù yònsò udi kaaba aka awu, yèyè mufwànyine kwikalakù, wèwè wàkasùngidiibwa kacya Yesù wàfwa. Kàdi kufwidikù kaaba aka kàdi webè mpùngà mukutèekela kumpàlà kwèbè to, bwà kubwela mu Bwikadi Bwèndè ne pashìishe kuCiitaba. Ncilongolola bwà mpindyewu. Mpindyewu udi ne cyà kuCiitaba. Wèwè ànu musambùke muyè dyàmwàmwà dyà Mashi, dìbà adi kwèna cingà cintu to ànu. . . Wàmányi kulumbulwishiibwa, bwalu udi ulumbulwishiibwa bilondèshile mùshindu wùdi mwenzè ne Difuta dyà cibawu dyà Mukalenge Yesù Kilstò. Nwamònu anyi? Wèwè udi. . .mwaba awu gùdi udilumbulwishila nkààyeèbè.

693 “Nènku Yèyè wàkatàpiibwa mpùtá bwà dishipa dyètù dyà mikenji, ne ku mibùndàbùndà Yèndè twàkondopiibwa.” Pa nànkù, kakwèna cintu cìndiku mémè mufwànyine kwikala naaci to, bwà kukwondopa. Kakwèna cintu cìdiku èkèleeziyà mufwànyine kwikala naaci to, bwà kukwondopa. Cintu cimwèpelè citùdiku mwà kusambidila ncyà ne, diitabuuya dyèbè kadipangidikù to, bwà ùlwe ku cyoshelu mu dindà emu bwà wítabè Kilstò bu Mwondopi webè, muwàkamwítabà bu Musùngidi webè amu. Ne kakùyikù. . . Nzambì ùtu wènza bishimà. Ùtu ùleeja bimanyinu binène. Mpofo, mpudimaci, tumàmà, bintu byònsò, bìdi byòndòpiibwa mu tabernacle emu mene. Kàdi nànsha byenzèke anyi to, twètù tudi tuCiitaba, nànsha nànkù. Misangu yàbùngì bintu abi bitu nku bikeènà-kumòna.

694 Mbanganyi bàvwàku kaaba aka kùkaadi maadyàlumingu matwè ku àsàtù, anyi ànaayi, pàvwà muntu awu mubwelè kaaba aka, mwikàle mpofo ne mucibùkile panshì, anyi musòmbe mu nkwasà mwikàle ne kajilujilu kakàyi kajaalàme? Ne kumpàlà kwà mémè kuumuka kumbèlu, ngàkamumòna mu cìkèènà-kumòna ne: “Nekwikalè muntu mulùme kuntwaku, wa nsukì mifìike, yènda yìlwa mvyà. Mukàjèndè mmukàjì wa mmwènekèlu wa ùkòka ntèmà, wa bidimu bìipacila ku makùmi àsambòmbò. Nealwe wènda ùdila,” ne neàndòmbè. “Ne bwà mémè kwalukila bwà kusambidila bàyèndè awu.” Muntu awu kusòmbyè mwaba wàwa mene.

695 Ki mémè kulwa. Mémè kwambila bàmwè bàà ku bânà bèètù kaaba aka ne: “Tàngilàayi bwalu ebu.”

696 Ne patwàkatùùlukà kuya ku cyoshelu aku, bakwàbò bàkaavwa basambile. Pàngàakayà bwà kusambila, ngàkuumuka dyàkàmwè e kwalukila kaaba aka. Ki mukàjèndè kujuukayè

ànu menemene mùvwà Mukalenge mwambè ne nebiikalè amu. Bantu munkaci mwà kutàngila, bwà kumòna ní bivwa mwà kwenzeka mùshindù awu. Kacya kacitukù cipangile to. Nènku pàakendelàye kuulu. . .

⁶⁹⁷ Twètù kulwa kujandula ne, muntu kampànda, Ngàngàbukà Ackerman, mu Birdseye mwàmwa, mu Indiana, nguvwa mumutùme kaaba aka; mwikàle mwena Kàtòlikè, ne mwanèndè wa balùme ùtu nsaserdose mu cisòmbedi cyà badyàmbike-balùme kuntwaku ku Saint Meinrad. Ne Ngàngàbukà Ackerman awu ùtu mwena dyànyì wa mu bulembi, nènku yèyè nguvwa mutùme muntu awu kaaba aka. Nènku Mukalenge kundeejaYè muntu mulùme wa nsukì mifiike uvwa mwà kumutùma, kàdi ncìvwa mumanyè ne ùvwa nganyì to.

⁶⁹⁸ Mémè kwamba ne: “Ùvwa n’Ngàngàbukà Ackerman anyi?”

⁶⁹⁹ Yèyè ne: “Ùvwa nyèyè.” Nwamònu anyi? Ki pashiishe muntu awu. . .

⁷⁰⁰ Mémè kwamba ne: “Cìdi EMU MMÙDÌ MUKALENGÈ WÀMBA.” Mémè kutùuluka. Mémè ne: “Mukalenge, juukilà kuulu.” Mwikàle mpofo ne kàyi mufwànyine. . .yèyè. . .Ka—kajilujilu-kajaalamiji kàkaavwa kafwè. Yèyè kàvwakù mwà kudìmanyina kuulu mùshindù ewu to. Nwamònu anyi? Ùvwa mùshindù awu munda mwà bidimu, muyè ku lùpitaadi lwà ba-Mayos ne myaba yònsò. Ki mémè kumwenzela ànu disambila cyanàànà, ne kumujuula kuulu. Ki yèyè uyààya wàwa, ùtùuluka wènda wèndela kuulu.

⁷⁰¹ Dyàmbedi kwambayè ne: “Ncyèna mwà kukumòna to.” Pashiishe kwelayè lubilà lukolè ne: “Èyowà. Ndi mwà kukumòna.” Mèsù èndè kutàbalawù mwaba awu, yèyè ùvwa Orthodexe, mukàjèndè, Presbytérienne.

⁷⁰² Bàmwè bantu bàtu bèèla meeji ne “Ba-Presbytériens kabàtu bèèla mbilàto, ne ba-Orthodoxes.” S’bivwa bikèngela nwènu kwikala babùmvwè. Bushùwà’s. Bàvwa bèèla mbilà mikolè bùupukilangana. Kwalukilayè e kwangata dikalù dyèndè dyà balèmà adi, kupàtukayè wènda wènda ùtùluka pa bibàndilu abi, ànu mùdì muntu yònsò ewu, mwikàle ùmòna ne wàkula ne—ne bikwàbò byònsò.

⁷⁰³ Mvwa mupetè mukàndà wà kùdiye, anyi mumbiikile ku tèlefonè, ditùkù adi. Ngeela meeji ne, Mwanèètù Cox nguvwa muyè kùdiye. Kwambayè ne: “Mèsù èndè àvwa àmusansakana.” Cyà bushùwà. Nkajilujilu aku, tujilujilu twà mèsù ntùdì munkaci mwà kusasa ne twàlukila ku mwoyi, nudi bamanyè’s, ne twàngatulula mwaba wàtù. Mulawu wàkuumushiibwa.

⁷⁰⁴ Wèwè mushiile bufùki njila, cintu nànsha cimwè cyòci kaciyi cicyàmakana bufùki to, dîbà adi ne—nebwènzè mwònsò mùdìbu buswè. Wèwè ne ndundu muswika ku dibòkò, ùpangisha mashi bwà kupitawù, ndekeelu wa byònsò cyanza cyèbè necifwe. Mpindyewu, bwalu, bilondèshile bufùki, nebiikalè bimpè bu

wèwè mwà kudishiya mùdidi amu. Kàdi cintu kampànda ncicyàmàkàne bufùki. Dìbà adi, wèwè kùyi mwà kucimòna to, kamwèna mùshindù bwà ngàngàbukà kucibàkulayè to. Kùdi bintu ànu bibidì bìdiyekù mwà kukwàcilapù mudimu: Cìdiye mwà kumòna, ne cìdiye mwà kulenga. Ki cintu cimwèpelè cìdiyekù mwà kukwàcilapù mudimu ncyòci aci: Cìdiye umòna ne cìdiye ùlenga.

⁷⁰⁵ Yèyè kàyi mwà kucimòna to, dìbà adi cidi ne cyà kwikala cyà mu nyumà. Dìbà adi, cintu cimwèpelè cidi mwà, kùdi cintu cimwèpelè cidi mwà kwenzeka; tudi tusabila, Kilstò umusha mulawu awu, wipata dyabùlù, nènku aci cibanga kulwa mwàci ne kale, cyòndopiibwe. Cidi cyòndopiibwa, nènku ki cyònsò cìdiku ncyòci aci. “Mu Dìna Dyànyi bòbò nebùpatè baadémòns.” Ncyà bushùwà anyi? Mmulayi mwenzela èkèleeziyà. Mmulayi wà bukolè. Cinganyi? Cidi, m’Bwikadi Bwèndè bwikàle neetù. Mpindyewu, cidi citùpangishà twètù bwà kwikala bapwàngàne mu dindà emu, bwà kwenza bintu abi ànu mwàkenzàYe Yèyè amu, mbwalu tucidi ànu mu cibwikilu. Nwamònu anyi? Kàdi tudi ne cyumvwilu kampànda mwaba awu cidi citwàmbila ne: “Kaa, èyowà’s.” Nwamònu anyi?

⁷⁰⁶ Nènku paùdi witaba dyòndopiibwa dyèbè, cidi cibwikilu cyàmba nànsha ciikàle cinyi, cidi ne bwalu ncidi Dìyi dyambè. Nwamònu anyi? Ki mùdibi. Ki mùdibi. Ne Dìyi di—di—ditu misangu yònsò ànu ne bwenzeji kumutù kwà nì ncinyi cyònsò. Dìyi dyà Cyèndèlèlèlè dyà Nzambi’s!

⁷⁰⁷ Tàngilàayi Sarah, matrice èndè mafwè, ne bidimu makùmì citèemà, musòmbe ne bàyèndè kacya pàcìvwàye ne bidimu dikùmì ne bisambòmbò anyi dikùmì ne mwandamutekète, kàyi bânà to; Abraham, lukàmà. Nzambi kukùdimuka e kubàpèèsha mwànà awu. Nwamònu anyi? Bwalu, bàvwa biitàbùuje. Bàvwa bàbìkila bintu bìvwà kabìyikù abi, bu ne bìvwakù. Bwela mu mùshindù awu mu dindà emu, wèwè mulundà wanyì.

⁷⁰⁸ Nènku dilòòlò edi, tudi tutèkemena...Panwìkalà bònsò balwe kutwèndela bwenyi, tudi ne disànkà dyà kwikalakù neenù kaaba aka mu dindà emu. Nènku Nzambi ìkalèku neenù. Ne pawikalà mu cimenga emu dilòòlò edi, tudi bafwànyine kwikala ne disànkà dyà kwikala neebè dilòòlò edi mu ntùngunukilu wa disangisha edi, pa Melekisedekè. Kàdi dìbà adi wèwè kùyipù to, wèwè ne èkèleeziyà webè sungasunga, ùye ku èkèleeziyà webè sungasunga awu. Ki—ki kaaba kèèbe kàà mudimu nkòkò aku. Pawikalà wa mu èkèleeziyà kampànda, ndà mwómò amu. Aka kàdi ànu kaatabernacle kakesè mutùdi tudìsangishila ne tubwela mu bwòmwè muntu ne mukwèndè. Mpindyewu, Mukalenge ànùbènèshè.

⁷⁰⁹ Nènku Mwanètùtù wa bakàji Gertie neàtwìmbilèku, Ngàngàbukà Munène Ùdi Kaaba Aka Mpindyewu. Nènku kùdi muntu wa disambidila mwaba ewu anyi? Elàayi byanza muulu,

aba bàdi baswè kubwela mu mulongo wà babèèdi, bwà kutèèka diitabuuja dyènù mu Kilstò. Èyo. Bu nwênù mwà kwelela mulongo ku *elu* luseke lwà èkèleeziyà, bu nwênù mwà kuswà. Ne bu bôbò mwa kukòkakù nkwasà awu kakesè ndambù, wêwè mwanèètù wa balùme, bu wêwè mwà kuswà, bwà twâpetakù ndambù wa mwaba muntwamu bwà kupicishilamù bantu. Lwâyi ku *elu* luseke.

⁷¹⁰ Nènku netwikalè mwà kusambila mpindyewu, patùdi twimba apa. Nènku nêndombèku bakùlù mwaba ewu, bàà mu dîngumba ànyì èkèleeziyà kanà yònsò, nànsha wa bishi, panwikalà nwitabuuja dyondopa dyà kùdi Nzambi, nudikù mwà kwimana pàmwè naanyì pa cibùmbà cyà ku cyambilu eci, bwà kusambidila babèèdi anyì? Netwikalè ne disànkà dyà kwikala neenù. Dîngumba kànà dyònsò, anyì kî ndîngumba to, anyì cyònsò cyùdi aci, netwikalè ne disànkà dyà kwikala neebè. Nudikù mwà kulwa mpindyewu, bwà disambila anyì? Bàndaayi bwà kwimana pàmwè naanyì.

Mwanèètù Neville, bu wêwè mwà kulwakù ne maanyì.



EBÈLÙ, NSHAPÌTÀ MWISAMBÒMBÒ ³ LUA57-0915M
(Hebrews, Chapter Six ³)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dindà, mu matùkù 15 a ngondo wa citèemà, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org